

# Solid Sistas by Jo Dorras

*[Theatre hem i dak. Jennie mo Mary oli wokabaot i kam. Jennie hem i stap pulum Mary i kam.]*

Jennie: Man ya .. Mary..! Kam hariap! Mi mi wantem danis ya! Bae Ironman bae i pleple!

Mary: Ironman?

Jennie: Eeh niufala band ya! Lid singa blong ol hem i.... hem i naes we.

Mary: Huia?

Jennie: Hem i gat ol smolsmol rasta mo voes blong hem.. Taem we hem i singsing mi harem se skin blong mi i difren!

Mary: Eeeh, wan gud wan!

Jennie: *[Hem i giaman pleple guitar.]* Kastom mo kalja i givim paoa long yumi!

Mary: Eh yu stap singsing be olsem wanem long boefren blong yu?

Jennie: Boefren?

Mary: Tony ya!

Jennie: Hem i no boefren blong mi tu!

Mary: Be hem i wanem ya?

Jennie: Hem i stap afterem mi oltaem. Mi les. Mi no wantem wan boe we i no gat wok...  
*[Hem i stan up mo hem i luk luk raon.]* Ahh! Be Lizzie mo Flora oli no kam iet..  
Bae yumi wet smol.

Mary: Lizzie?!

Jennie: Wanem i rong?

Mary: Evriwan i stap tokabaot hem Jennie! Sapos we Malcolm hem i save se mi kam blong folem wan woman olsem bae hem i kros ya!

Jennie: Yu bin gudfala fren wetem hem bifo.

Mary: Yes, bifo, be i no naoia! *[Hem i wokabaot i go longwe lelebet long Jennie.]*

Jennie: Mary...*[Hem i go sidaon klosap long Mary.]* Mary.. lukim ol bigfala star... antap long skae..

Mary: Wanem i rong, ol star ya oli stap antap long skae ya oltaem nomo!

Jennie: Bae yu mekem wan wis!

Mary: Wanem?! Pikinini bakegen!

Jennie: Bae yu luksave drim blong yu!

Mary: Giaman!

Jennie: Mary... i no gat wan samting we yu wantem mekem .. samting we bae yu glad we yu glad sapos yu kasem!

Mary: Mi wantem gat wan smol boe.

Jennie: Yes be.. i no gat wan mo samting bakegen.. wan samting we .. Yu save wanem we mi minim!

Mary: Yumi ol gel yumi save mekem wanem? Yumi wok blong yumi hem i blong klinim haos mo gat fulap pikinini hemia nomo! *[Hem i laf.]*

Lizzie: *[Hem i ron i kam.]* Hey! Jennie! Mary! *[Klus blong hem oli flas lelebet. Jennie hem i kisim hem mo Mary tu, be Mary i no glad tumas blong lukim hem.]* Happi Krismes!

Mary: *[Oli kis.]* ...Lizzie. Man, yufala ya we ... ol klus ya we .. naoia yufala ol flas woman nomo nao!

Lizzie: Flas woman? Ol klus blong second han nomo! Olsem wanem long yu? *[Musik i faerap. Lizzie hem i karem aot wan bottle. Hem i dring mo afta hem i givim long Jennie.]*

Mary: Mi oraet. Malcolm i faenem smol wok blong hem.

Lizzie: Smol gel blong yu?

Mary: Mi jes sendem hem i go long aelan las taem ya nomo.

Lizzie: Ohh. Yu sendem hem long aelan from?

Mary: Yu save nomo, hem i mo isi olsem.

Lizzie: Okay... *[Hem i tekem aot wan bottle we i stap long basket blong hem, mo hem i dring.]* Hmm... Jennie! Mi bin karem wan botel dring! Bae yu harem gud afta bae yumi danis!

Jennie: Mi no stap dring plante ya..

Lizzie: Ya!

Jennie: *[Hem i dring.]* Ya Mary... yu bakegen.

Mary: Malcolm bae hem i no glad sapos we mi mi dring.

Lizzie: Kass.. yu tink se bae hem i no dring?

Mary: *[Hem i pulum bottle i kam mo hem i dring.]* Whoa! Wanem ya? Alkol blong laet?

Lizzie: Whisky! *[Hem i pointem label.]* Mi no stap dring ol doti samting olsem alkol blong laet! Bae yumi go danis?

Mary: Yumi stap wet long Flora.

Jennie: Lizzie.. Wanem nao drim blong yu?

Mary: Eh Lizzie, yu lelebet yu ansarem ol kwestin blong hem!

Jennie: Mi wantem save! Lizzie?

Lizzie: Mi? Mmm.... Merial bae hem i passem exam blong hem... *[Hem i dring bakegen.]* Mo mi bae mi faenem wan olfala man we hem i gat fulap mani long poket traoses long hem.. mo ...

Mary: *[Hem i stap dring iet.]* Afta bae yu maredem hem, afta yu .... tufala stap smoltaem nomo be hem i sikis feet under from ...! *[Mary i point long Lizzie mo oli laf.]*

Lizzie: Long niu yia ya! *[Hem i tekem bottle mo hem i dring bakegen.]*

Flora: *[Hem i ron i kam.]* Mi bin tink se mi let ... *[Hem i werum wan shirt mo wan skirt. Ol narawan oli putum t shirt mo traoses o jean trousa.]* Mi stap fraet se bae yufala evriwan i go insaed finis!

Jennie: Flora... *[Hem i kisim hem.]* Yu luk naes we!

Flora: Mi?!

Mary: Hey! Hey! Wanem drim blong yu Flora?

Flora: Drim? Blong mi?

Lizzie: Samting we yu wantem mekem! Jennie hem i wantem save ol drim blong yumi evriwan!

Jennie: Yufala... ya we

Flora: Mi? Mi wantem talem gud nius ol abaot long ples ya... Blong helpem ol man oli lukim laet blong Jisas Krist..

Lizzie: Bae yumi go danis firstaem Flora. Yu no save danis long longfala skirt ya?

Flora: Mi no tink se bae mi danis..

Lizzie: Flora..Yu kam blong mekem wanem? Dring samting ya nao.

Flora: No...

Lizzie: Yumi no stap long wan jioj miting, Flora. Dring smol!

Flora: Mi.... mi no..

Mary: Testem nomo!  
*[Flora i tekem botel mo hem i luk luk raon blong jekim se i no gat man i luk hem, mo hem i dring. Afta hem i kof. Ol gel oli singaot. Musik i faerap.]*

Lizzie: Ale yumi go nao! *[Oli laf mo oli ron i go aot. Laet i shine long ol boe we oli stan up long stage olsem ol musician. i gat Tony, Edward, Leonard no Fred, wetem sam mo man bakegen we oli stap ple bihaen. Ol gel oli stan up mo oli watchem ol boe ya we oli pleple.]*

Man 1: Helo evriwan! Mifala ol boe long Ironman, mifala i wisim hapi krimes long yufala!

Ol gel: Hapi Krismes!

Man 1: Bae yumi danis delaet tunaet!

Ol gel: Delaet!

Jennie: Hem i naes ah?

Lizzie: Bae yu askem hem blong danis wetem yu Jennie!

Kalo: Fes of all mifala i wantem talem tank yu long Donal.. longwe.. *[Donal hem i stan up.]* we hem i bin helpem mifala blong pem ol instruman ya. Donal! *[Ol man oli klap nao.]*

Mary: Awe mi mi laekem man ya long drum. Yu laekem hu Lizzie?

Lizzie: Mi? Man we poket blong hem i fulap gud!

Flora: Lizzie!

Jennie: Yu yu laekem hu Flora?

Flora: Mi laekem.... Hem!

Ol gel: Weeee!

Kalo: *[Hem i stat blong singsing.]*  
 Kastom mo kalja  
 i givim paoa long yumi  
 Kastom mo kalja  
 Stampa blong laef blong yumi!

Yumi stap konfuse tede  
 Ol difren toktok i go raon  
 Mi no save faenem wei  
 Mi stap lus long ol brit laet long taon!  
 Mi stap sperem rod nomo  
 Mi wetem ol fren  
 Taem we sun i stap go daon  
 Mi nidim kava mo ciggerette  
 Mi stap long haos blong brata  
 Be hem i no wantem helpem mi  
 Mi go lukaotem sista  
 Be hem i stap swer long mi  
 Wan de bae mi go bak long vilij  
 Faenem ples long society!

*[Lizzie hem i stap danis wetem Mary. Jennie mo Flora oli danis tugeta.]*

Kastom mo kalja  
Oli givim paoa long yumi  
Kastom mo kalja  
Stampa blong laef blong yumi!

Flora: Ohh Jennie.. hem i naes we! Mi mas go talem long ol se mi laekem singsing blong ol we!

Mary: Flora! Yu dring wan tee spoon nomo mo hed blong yu ilus!

Flora: Mi no drong!

Jennie: Mi wis se mi nao mi save stap long wan band olsem.. Bae ol man oli lukim mi mi singsing..

Flora: Hey olgeta mi.. mi stap enjoyem mi bigwan. Yu laekem band ya?

Ol gel: Yes!

Flora: Mi laekem singsing blong ol tumas! Yu tink se oli save singim sam christian singsing?

Lizzie: Um mi no save!

Flora: Yu tink se mi save askem ol? Klosap hem i krismes.

Lizzie: Lego Flora... Bae oli pleple bakegen nao. Yumi save danis.. ale ol gel..  
*[Evriwan oli danis i go long ples blong danis blong ol.]*

Singsing: *[Ol gel oli singsing ol part blong ol, ol boe oli singsing ol part blong ol.]*

Boe i luk gel

Gel i luk boe

Samting ya hem i lav?

Boe i askem

Bae yu kam aotsaed wetem mi?

Samting ya hem i lav?

Gel i gat bel

Boe i fas nao

Samting ya hem i lav?

Oli mas stap tugeta

Blong lukaotem pikinini

Samting ya hem i lav?

Wanem ya hem i lav?

Mi wantem save

Mi no wantem stap sori long ful laef blong mi

Talem long mi plis

Wanem ya hem i lav?

*[Tony i stap danis wetem Jennie .]*

Tony: Mi mi save wanem ya lav Jennie..

Jennie: Mi no tink!

Tony: Yu no save se mi mi laekem yu?

Jennie: Tony... Oh!

Tony: Wanem?

*[Wan man hem i kam insaed. Hem i drong. Hem i Malcolm, man blong Mary. Hem i drong nogud. Hem i lukim Mary i stap danis wetem man ya. Hem i wet smol mo afta hem i go pulum aot hem.]*

Man: Yu kranke?!

Malcolm: Woman blong mi! *[Hem i stap tok long man ya.]* Yu stap mekem wanem?  
*[Hem i stap pul pulum Mary olabaot. Ol man oli stap kam raon long ol.]*

Mary: Mi no mekem wan samting nating.. mi stap danis nomo...

Mary: Malcolm!

Malcolm: Yu kam wetem mi nao Mary!

Mary: Mi stap wetem ol gel fren ya!

Lizzie: Yu no wari Malcolm. Hem i stap wetem mifala..

Malcolm: Woman blong mi i no stap go long ol danis! Hem i mared finis! Bae hem i no folem rod! *[Hem i lukim Lizzie.]*

Lizzie: *[Hem i luk Malcolm olsem we hem i wan pis doiti.]* Afta yu nao yu stap mekem wanem long naet?

Malcolm: Solmit!

Flora: Malcolm.. Mary i no stap mekem eni nogud samting.

Malcolm: Yu kam wetem mi nao ya... *[Hem i stat blong pulum Mary i go. Mary hem i singaot.]*  
*[Jennie hem i stap pulum Tony i kam be hem i no wantem.]*

Jennie: Tony! Stopem hem..

Tony: Hem i drong tumas Jennie. Lego.

Jennie: Bae hem i kilim nogud Mary. Tony...

*[Jennie hem i lukim Tony long wan kros fasin mo hem i wokabaot i kam kasem Mary.]*

Jennie: Sekuriti! Sekuriti! Stopem man ya!

Malcolm: Hem i woman blong mi! Mi pem hem finis! Aot long rod! *[Hem i pusum sekuriti. Mo sekuriti i kilim hem.]*

Fred: Faet! Faet!

Leonard: Faet! I gat faet! *[Ol boe oli roni go long faet ya mo ol gel, Mary tu oli roni go wan saed blong hid.]*

Yumi ol boe

Yumi ron from samting ya nao

Bae yumi luk hu nao hem i mo strong!

Bae yumi tekem botel

Pulum aot smol naef

Letem han i flae!

Afta

Bae yumi tokabaot ful naet

Man ya! Mi tonem mi olsem ya

Mi sakem han blong mi

I fas long fes blong hem

Hem i kakae tut wan taem!

Mifala i stap soem aot long ol narafala boe

Se mifala nao!

Ol man!

Sekuriti: Aotsaed! Yu aotsaed! *[Hem i stap sakem Malcolm i go aotsaed.]*

Malcolm: Mary! Yu kam nao ya!

Jennie: Mary.... *[Mary hem i wokabaot i go olsem we hem i go long wan ded, mo hem i folem Malcolm i go aotsaed.]*

Mary!

Lizzie: Bae i mo wos sapos we hem i no go..

Flora: Ohh... yumi no save helpem hem?

Lizzie: Yu tink se yu save faetem Malcolm?

Tony: *[Hem i wokabaot i kam.]*

Jennie.: Kam bae yumi go sidaon longwe..

Jennie: Yu go! Mi les!  
*[Ol boe oli stap kam insaed bakegen nao. Donal hem i stap wokabaot wetem Fred.]*

Fred: Mi mekem save hem! Tony yu luk? Hem i faldaon be mi mi girap mo.. *[Hem i wokabaot i go wetem Tony. Tony hem i stap luk bak long Jennie be Jennie i no wantem luk hem bakegen.]*

Donal: Ol gel yu bin fraet nogud ah? Evri samting i finis finis nao.

Flora: Mi sori tru long Mary. Mi.. mi...

Donal: Wok blong jalus! Plante gel oli stap mekem rabis fasin tede. *[Musik i stat bakegen. Donal hem i lukluk Flora.]* Bae yumi danis bakegen nao olgeta! Yu nao Flora ah? Gel blong pastor?

Flora: Yes..

Donal: Yu wan naesfala gel.... *[Hem i stan up klosap long hem.]*

Lizzie: Hem i gat rabis tingting long yu Flora.

Donal: Kam.. bae yumitu danis.

Flora: Be...ohhhh....

Donal: Wanem i rong?

Flora: Ohh ... bel blong mi i stap tonton ... istap... Mi mi wantem go long haos nao. Jennie...

Jennie: Mi tu mi enaf. Lizzie bae yumi go nao.

Donal: Lizzie... Yu stap. Bae mi pem dring blong yu. *[Hem i putum han blong hem raon long shoulda blong Lizzie.]*

Lizzie: Yu go firstaem Jennie. Bae mi lukim yu afta...  
*[Hem i putum han blong hem raon long Donal mo tufala oli stat blong danis.]*

Flora: Ohhh....

Jennie: Haos! *[Ol laet oli go aot.]*

*[Nois blong wan trak i pulup. Trifala akta i stap bihaen long stage nomo.]*

Driva: Mi no save go olwei.

Jennie: From?

Driva: Las naet wan boe i bin pusum wan smol naef long nek blong mi. Hem i karem aot evri mani blong mi. Yufala i save jump aot long ples ya! *[Nois blong doa blong bus we i open mo sareme bakegen. Nos blong trak i go. Jennie o Flora oli wokabaot i kam long stage. Nois blong sam boe oli singaot longwe long backgraon.]*

Flora: Ohhh Jennie...hed blong mi i raon.

Jennie: Hariap Flora! *[Oli wokabaot smol afta nois blong ol boe we oli stap drong long rod.]*

Chorus: I gat plante hambrew i stap iet!

Yumi bin dring  
Alkol blong laet

Mo colgate

Hed ilus nao!  
Yumi stap stan up long rod ya  
Yumi singaot kranke mo swer! *[Oli singaot.]*  
Sapos yu woman  
Bae mifala i karem yu long smol bus mo...*[Ol boe oli singaot mo laf.]*  
Sapos yu man  
Bae mifala i tekem evri mani blong yu  
Mo klus tu!  
Bae yufala we i stap long ol haos olabaot long ples ya  
Yufala i no save silip!  
Bae mifala ol boe i stap wokabaot mo singaot kasem delaet!

Jennie: Flora... *[Oli traem hid.]*

Flora: Papa God plis no letem ol boe i lukim mifala...

Jennie: Stap kwaet! Bae yu mekem bae oli harem yumi tu!

Boe 2: Eh! Jif i ringim polis! Polis bae oli kam!

Boe 1: Bae oli kilim nogud yumi! Kwik! *[Ol boe oli ron nao.]*

Jennie: Flora kam! Flora ron!

Flora: Tank yu Papa God! *[Oli ron i go.]*

*[Laet i kam up olsem we hem i delaet finis. Wan yangfala gel hem i kam insaed. Hem i stap rubbem eye blong hem olsem we hem i taet. Hem i stap wet. Lizzie hem i wokabaot i kam insaed. Ol klus blong hem oli olabaot mo hem i wokabaot olsem we hem i drong smol iet.]*

Merial: Lizzie..

Lizzie: Smol sista! *[Hem i kisim hem. Merial i wipem maot blong hem long baksaed blong han blong hem, from smel blong Lizzie i nogud.]*

Merial: Lizzie yu go wer kasem nao ya?

Lizzie: Kasem nao?

Merial: Hem i bigfala de finis!

Lizzie: *[Hem i go sidaon.]* Wanem i rong?

Merial: Mi bin stap miwan long ples ya.. ol drong man oli stap singaot olabaot!

Lizzie: Hey! From wanem yu no stap wetem ol kasen blong yu?

Merial: Mi les long ol...

Lizzie: Ol boe oli drong i stap raon long ples ya! Yu no save stap yu wan! Bae oli rapem yu! Yu kranke!

Merial: Auntie hem stap toktok nogud Lizzie. Hem i talem se...

Lizzie: Wanem?

Merial: Hem i talem se yu .. stap folem rod nomo. Wan de ol man bae oli kam bonem haos blong yumi.. mo katemaot hair blong yu.

Lizzie: Hah!

Merial: Mi no laekem taem we oli toktok nogud long yu Lizzie.  
 Lizzie: Yu stap sem long mi?  
 Merial: Lizzie...  
 Lizzie: Mi nao mi stap putum kakae long maot blong yu! Mi stap pem skul fee blong yu! Oli save toktok gogo, be oli no stap sendem ol pikinini blong ol i go long skul! Mi nao mi wok from mani blong skul fee!  
 Merial: Mi save Lizzie...  
 Lizzie: Yu no lisen long ol Merial.. ol dubolfes! [*Merial hem i sidaon klosap long Lizzie mo hem i tekem han blong hem.*] Oli kam askem mani long mi! Oli save se mani ya i kam wer!  
 Merial: Mi glad se yumi stap tugeta bakegen Lizzie.. [*Hem i putum hed blong hem long sholda blong hem.*] Las naet mi bin fraet tumas. Mi lokem do blong haos.. ol drong man oli singaot fulnaet. Mi no bin silip nating.  
 Lizzie: Sapos wan man hem i tajem yu Merial, bae mi mi kilim ded hem!  
 Merial: Mi oraet Lizzie.  
 Lizzie: Yu lukaot long ol man.. Yu no mas letem eni man i tajem yu... [*Merial hem i stap silip long han blong Lizzie nao. Lizzie i kisim hem.*] Yu bae yu no folem sem rod olsem mi Merial... [*Hem i rubbem hed blong hem.*] Yu bae yu go long skul olwei! Bae yu faenem wan gudfala wok. Wan de bae yu faenem wan man, wan man we hem i gud nomo.. bae yu gat ol naesfala pikinini.. mo wan haos.. wan briks haos. Mi nao bae mi haos gel blong yu.. [*Hem i laf, mo hem i strokem hair blong Merial. Gas bottle iring.*] Kass.. wanem ya? [*Merial hem i wek up smol.*]

[*Ol man oli wokabaot i kam.*]

Miting! Miting! Hariap!

Jif hem i singaotem wan miting!

Yumi enriwan i mas go!

Wanem i hapen?

Ol boe oli mekem trubol bakegen!

Ale yumi go!

Miting bakegen!?

Mi mi les ya!

Yu mas kam nao!

Mi stap wokem ol kakae blong krismes ya!

Ale yumi go!

[*Lizzie hem i girap mo hem i wokabaot i go wetem Merial. Oli no go sidaon wetem ol narawan we oli stap. Jennie hem i kam insaed wetem smol brata blong hem, Jimmy. Flora hem i wokabaot i kam long narasaed. Mary hem i wokabaot i kam insaed long mittel blong ol toktok ya wetem wan towel ova long hed blong hem. Ol narafala akta oli kam insaed.*]

Jif: Morning olgeta man mo woman. Traem hariap lelebet! Bae yumi openem miting ya wetem wan prayer! Pastor! [*Ol man oli bendem hed blong ol nao.*]

Pastor: Papa God, mifala i stap askem yu blong helpem yumi ol man blong komuniti ya blong stap gud tugeta. Yumi stap klosap long taem we yu bin sendem boe blong yu blong kam stap wetem mifala, Krismes ya. Yumi ol kristian man i mas folem stret rod! Yumi no mas mekem ol rabis fasin! Helpem mifala blong liv long fasin we hem i gud long eye blong yu Papa God, long nem blong boe blong yu Jesus, Amen.

Ol: Amen!

Jif: Yufala i save from wanem nao mi singaotem miting ya?! Ol boe nao oli drong nogud bakegen las naet! Yumi we i stap long ol hao olabaot long ples ya, yumi no save silip nating! Mi les! Mi les long samting ya! Mi pulum miting plante taem finis! Be... yumi stap long miting bakegen! Werum ol boe? Oli shud stap long miting ya tu!

Man: Polis oli bin kam from ol jif.. oli stap long namba six.

Jif: I gud nomo! Polis bae oli wipim nogud olgeta! Be nao ya mi wantem harem tingting blong yufala.. ol mama mo papa.. ol brata mo sista blong ol boe ya! Hao nao bae yumi stopem ol rabis fasin we oli stap mekem?

Man: Jif.. mifala evriwan i les long fasin blong ol boe ya. Mifala i stap kilim nogud ol be... i no gat jenis nating.

Wom: Polis oli kilim nogud ol hao mas taem.. be ol boe oli go ahed blong mekem sem fasin bakegen!

Man: Ol stoa olabaot long ples ya oli salem alkol blong laet long ol! Oli save finis se bae ol boe oli dring.. be oli salem iet.

Jif: Ol stoa kipa tu i mas tinkabaot yumi ol man we i stap sava from wok blong ol boe ya! Flora.. yu wantem talem wanem?

Flora: Jif.. mifala ol gel.. mifala i fraet blong wokabaot long naet. Ol boe ya oli stap forsesem ol gel!

Jif: Jennie!

Jennie: Mifala i stap kam bak let lelebet las naet jif.. ol boe oli bin stap long rod. Mitufala i fraet kranke..Oli drong nogud we. Oli stap singaot ol doiti samting .. ol nogud swer. Laki oli bin harem se polis bae oli kam , mo oli ronwei. Sapos no....

Jif: Fasin blong ol yangfala long ples ya i mas jenis!

Ol: Yes.. i tru nomo!

Jif: Komuniti ya hem i fulap wetem ol rabis fasin! Yumi mas kontrolem gud yumi. Firs samting hem i respek! Ol boe oli nomo respektem ol gel! Yufala ol gel yu nao yu mas dress up gud! Bae i mekem se ol boe nao oli no gat rabis tingting long yufala. Stat long tede bae i gat fin sapos we gel i putum traoses aotsaed long hao blong hem! Evriwan i agri?*[Flora hem i putum up han blong hem.]*

Lizzie: Yu kranke?!

Jennie: Flora! *[Flora i putum han i go daon. Ol naraman oli putum han i go antap.]*

Jif: Fine blong putum traoses hem i tu hundred vatu long firs taem! Bae i go antap long wan taosan namba tu taem!

Lizzie: Oli mas faenem ol boe i no yumi!

Flora: Jif i talem...

Jif: Pastor! Klosem miting ya wetem wan prayer!

Pastor: Tank yu Papa God blong givim ol gudfala tingting long ol man ya. Mekem se ol gel mo boe blong yumi oli save respektem tingting blong ol bigman blong yumi. Long nem blong boe blong yu Jesus...

Ol: Amen!

Chorus: Yufala ol gel i mas putum dress  
Kavremap ol bodi blong yufala!  
Yu no mas givim rabis tingting long ol boe  
Blong yumi!  
Lukim hem  
Long ol jean traoses ya!  
*[Lizzie hem i wokabaot long jean traoses blong hem.]*

Yumi save lukim evri samting!  
Ohh!  
Mo gel ya long t-shirt  
Mo sot traoses!  
Hem i no gat respek nating!  
Hem i wantem stap semak olsem ol boe!  
Ol gel blong yumi  
Oli mas putum aelan dress  
Ol naesfala dress  
Olsem gel ya longwe  
Olsem olsem olsem gel ya longwe ...

Leonard: Bae yu luk naes long wan aelan dress Lizzie!

Lizzie: Go hangem nek!

Fred: *[Hem i go pinchim Flora.]* Yu wan gudfala gel ah?

Flora: Awe! Fred!

Tony: Jennie, karem aot traoses!

Jennie: Go lus!

Fred: Yufala nao i stap spolem kastom mo kalja blong yumi!

Jennie: Werum nambas blong yu Fred?!

Lizzie: Karem out kalsong blong yu mo hangem long sorae blong yu!

Fred: Yufala i save laf hao mas be long end blong manes bae yu pem fine i go long jif!  
*[Ol boe oli laf mo oli ronwe.]*

*[Mary hem i wokabaot i kam wetem wan towel long hed blong hem.]*

Lizzie: Mi no kea tu! Bae mi no putum dress! Neva! Olsem wanem long yu Mary? Yu bae yu werem aelan dress?

Mary: Mi?! Neva!

Flora: Be jif hem i talem se...

Lizzie: Jif hem i save werum dress sapos hem i wantem.

Jennie: Lizzie yu no stap toktok olsem!

Merial: Tut i so Mary?

Mary: Tut? Ohh tut yes...

*[Jimmy hem i ron i go mo pulum aot towel, mo Mary hem i singaot mo kavremap fes blong hem.]*

Mary: Jimmy! Givim towel i kam bak!

Jennie: Jimmy! Givim towel long hem nao ya!

Mary: Stupid!

Jimmy: Ya! *[Jimmy hem i putum towel long han blong Mary. Mo hem i koverem up fes blong hem bakegen.]* Yu mekem wanem nogud Mary? *[I laf.]*

*[Mary hem i go blong slapem Jimmy. Be Jimmy hem i ronwei, mo hem i giaman singaot olsem we hem i fraet.]*

Lizzie: Mi bin save se bae hem i kilim nogud yu. Man ya hemi..

Mary: No be hem i drong ya.

Flora: I so Mary?

Mary: Hem i faetem fes blong mi.. Afta mi harem i so tumas.

Jennie: Yu mas riportim hem Mary!

Mary: Hem i talem se bae hem i nomo mekem. Se las wan ya nao!

Lizzie: Yu lukaot Mary. Wan de bae hem i kilim ded yu ya.

Flora: Lizzie! *[Malcolm hem i wokabaot i kam.]*

Malcolm: Yu stap stori iet Mary? I gat fulap wok blong mekem long haos.

Mary: Mi stap kam nao..

Malcolm: Yu stap westem taem blong yu wetem ol fren. Mi talem long yu finis .. yu mas jenisim fasin ya.

Mary: Ale olgeta.. lukim yu! *[Hem i talemaot long tufala gel. Mary hem i stap wokabaot i go.]* Ale Lizzie. *[Ol narafala gel oli harem nogud mo Merial mo Lizzie oli stat blong go mo Flora tu.]*

Jennie: I no stret! I no stret nating!

Lizzie: Bae yu mekem wanem? Hem i olsem nao Jennie! Hariap Merial!

Flora: Ale Jennie!  
*[Jennie hem i stan up mo wokabaot. Hem i stat blong singim singsing ya]*  
 Hem i olsem nao!  
 Hem i olsem nao!  
 Man hem i boss mo woman hem i stap  
 Blong bonem pikinini mo mekem ol wok!  
 Bae i neva jenis?  
 Bae i neva jenis?  
 Yumi ol woman yumi haf long population  
 Be taem we yu luk luk raon  
 Werum ol woman lida?  
 Ol woman polaetician?  
 Fromwanem nao ol woman  
 Oli no kasem high education?  
 Bae i neva jenis  
 Bae i neva jenis?

Jennie: Bae mi no stap olsem tu!

*[Jennie hem i wokabaot i go. Hem i kam kasem aria blong haos blong hem. Hem i go pikimap wan magazine, mo hem i go lie daon long graon wetem magazine ya. Hem i stap tonem ol pages blong magazine.]*

Jennie: Ahh! Musik....Ol grup olsem Ironman! Man ya wetem dak glass... Ol gel tu we i stap pleple mo singsing! *[Hem i rid nao.]* Long musik industri hem i ol man we oli stap antap! Plante gel oli singsing be i neva bin gat plante gel band.. Tru ya! I no gat band blong ol gel nating long ples ya! .. Bae yumi lukim sam long olgeta gel band we oli bin kam antap ova long las five yia... *[Hem i nomo rid nao.]*  
 Ol gel ya nao! Ohh... oli holem microphone olsem. Oli holem gitar olsem...*[Hem i stan up mo hem i akt olsem we hem i gat wan microphone no afta wan gitar long han blong hem.]*

Singsing: I gat wan yangfala gel  
 We i stap long ples ya!  
 Hem i save singsing *[Jimmy i stap kam insaed long haos]*  
 Mo ple gitar  
 Sapos yu harem vois blong hem

Bae yu save se  
Hem i save mekem!  
Ahh hah hah ces't moi!

Mi save singsing! ..... [*Hem i lukim Jimmy we i stap mekem kartoon blong hem long saed long hem.*]

Jimmy: Yu stap mekem wanem ya?

Jennie: No gat samting! [*Hem i stat blong ridim magazine ya bakegen.*]

Jimmy: Yu stap ridim wanem? [*Hem i traem karemaot magazine be Jennie i holem taet.*]

Jennie: Magazine blong mi!

Jimmy: Givim! [*Hem i pulum magazine i kam mo tufala ifaet from. Wan page i kam aot.*]

Jennie: Jimmy! Yu... yu stap spolem evrisamting!

Jimmy: Mi no... mi no minim blong brekem.. [*Hem i pusum pepa i go bak long Jennie.*]  
Sori.. [*Jennie hem i no toktok. Hem i tekem pepa ya mo hem i lukim.*]

Jennie: Sori!?

Jimmy: Sapos yu bin talem wanem we yu stap ridim...

Jennie: Yu no wantem save tu! Yu no interes blong rid! [*Jimmy hem i wokabaot i go longwe mo hem i stat blong pleple wetem wan stik long graon. Jennie hem i luk se hem i harem nogud.*]

Jennie: Jimmy...

Jimmy: Go lus!

Jennie: Jimmy.. sori. Kam.. kam bae mi shoem long yu... luk.. [*Hem i holem magazine blong soem long hem. Hem i giaman blong nomo interes nao.*] Lukim ol pikta ya..

Jimmy: [*Hem i kam luk nao.*] Wanem ya?

Jennie: Ol gel we oli stap mekem musik...

Jimmy: Ol gel we oli stap singsing?

Jennie: Olgeta ya oli ol gel band. i stap talem se ol gel oli singsing plante olgeta wan, be i neva bin gat plante gel band. Wan wan nomo. Hemia nao ol pikja blong olgeta gel band ya!

Jimmy: Gel band?

Jennie: Gel i plem elektrik gitar, drum, keybod mo singsing tu.

Jimmy: Giaman!

Jennie: Ol gel ya nao!

Jimmy: Ol gel ovasee!

Jennie: Yumi gat Vanessa Quai! Plante gel we oli singsing.. mo sam string band blong ol woman tu!

Jimmy: I no gat wan gel band nating long ples ya! O gel ya oli bunbun gogo.. mo .. klosap oli malmal! Hey! [*Hem i stop laf nao.*] Yu! Mary, Lizzie mo Flora! Yufala isave kam wan gel band! Bae yu dress up olsem mo jif bae hem i ronnem yufala evriwan!

Jennie: Jimmy!

Jimmy: From wanem nao yu no mekem? Yu save singsing gud Jennie!

Jennie: Jimmy yu no jik!

Jimmy: Mi no stap jik.. mi minim Jennie. Yu no skul nao .. yu save gat wan band blong yu wan!

Jennie: Bae i had ya. Ol gel oli stap bisi oltaem. Mifala i no olsem yufala ol boe we istap pleple nating ful de.

Jimmy: Yu gat fulap exkus ah?

Jennie: Hem i wan stupid tingting Jimmy!

Jimmy: Mi bae mi go ple volley daon.

Jennie: Hem i klosap tu dak nao. Kakae bae i redi i no longtaem.

Jimmy: Ol boe oli ple ple iet.

Jennie: Jimmy.. Yu no stap folem ol bigfala boe ya.

Jimmy: Bae mi kam bak i no longtaem! *[Hem i ron i go aot. Jennie hem i pikimap magazine mo hem i holem long han blong hem, afta hem i luk i go antap.]*

Jennie: Gel band!? Mi.. Lizzie.. Mary.. mo.... Flora! Olsem wanem sapos we mi askem olgeta? Hey! Ol gel!  
*[Laet i kam up long ol gel long bandstand.]*

Ol gel Eeeh?

Jennie: Bae yumi gat wan gel band! Wan elektrik band!

Ol: Wanem?!?

Jennie: Yu wantem stap insaed long wan band Lizzie?

Lizzie: Yu kranke!

Jennie: Mary?

Mary: Malcolm hem i talem se mi stap westem tumas taem wetem yufala!

Jennie: Yu Flora?

Flora: Mi mas go long jioj i no longtaem..

Jennie: Ahhh! Bae i no save wok!  
*[Hem i kavremap hed blong hem wetem magazine mo hem i faldaon olsem we hem i harem nogud.]*

*[Ol boe oli stap wokabaot raon tugeta. Jimmy hem i folem olgeta.]*

Fred: Yu stap folem mifala from?

Leonard: Yu yangfala tumas! Go long kaos!

Jimmy: No gat samting blong mekem long kaos.

Tony: Yu go!

Fred: Bae yumi traem kava bar ya... Mi save man blong kava bar ya!

Leonard: Traem! Traem! Mi bae mi dring long wan hundred!*[Ol narawan oli glad.]*

Fred: Hey! kalo! Mi ya Fred!

kalo: Fred... ah yes.

Fred: Olsem wanem? Mifala i wantem dring kava... Bae yu givim fo sel long kaont?

Kalo: *[Hem i point.]* Luk notis ya? i talem se 'No gat mani, no gat kava!' *[Ol boe oli lukim olgeta. Man we hem i stap salem kava hem i go ahed blong klinim ol kup.]*

Fred: Be yu kalo mi fred, yu save gud mi!

kalo: Faenem wok mo karem mani blong kava.. afta yu save dring!

Fred : Bastard! *[Oli stap wokabaot i go aot. Donal mo Lizzie oli stap sidaon longwe.]* Hey luk! Solmit ya wetem binestan longwe!

Tony: Sss! Hem i gat mani ya!

Leonard: Kam.. bae yumi talem helo long hem!

Fred: Olsem wanem bigman! *[Hem i go sek han wetem Donal.]* Lizzie!

Lizzie: Yufala...

Donal: Ahhh.. ol boe! Olsem wanem?

Tony: Olsem oltaem. Mani i no kat.

Fred: Mifala ibin wantem dring wan wan sel be..

Leonard: Poket i empti!

Donal: Bae mi pem wan wan sel long yufala.. from krismes ya! [*Hem i wokabaot i go long bar.*]

Tony: Tank yu Donal! Tank yu tru! [*Donal hem i stap pem kava nao ya.*] Okay ol boe! Yumi set nao ya!

Lizzie: Laef i had tru tede. Yufala i no save pem kava o cigarette.

Fred: Be yu save faenem mani isi nomo ah Lizzie?

Leonard: Yu stap werum traoses iet. Yu no harem toktok blong jif? Yufala ol gel yu mas gat repekt! Eh Jimmy?

Lizzie: Jimmy! Yu stap mekem wanem?

Jimmy: No gat samting!

Lizzie: Yu no westem taem wetem ol boe olsem.

Fred: Olsem wanem?

Lizzie: Yu stap tokabaot respekt! Yufala nao yu stap dring kranke mo stihl olabaot long ples ya!!

Tony: Lizzie, Lizzie.. mifala i no stap mekem olsem tu!

Fred: Yu no save toktok, yu stap stilim ol man olabaot long ples ya. Yu no save toktok!

Donal: Hey! Kam karem kava blong yufala! Mi karem long yufala tri nomo. Bae yu tinkabaot samting ya taem blong eleksen!

Tony: Yes boss!

Donal: Lizzie.. [*Hem i karem kava blong hem i kam.*] Blong yu ya... [*Oli wokabaot i go blong dring kava.*]

Fred: Ale.. yumi go dring! [*Ol boe oli wokabaot long bar.*] I no yu Jimmy!

Jimmy: Mi save dring!

Tony: Yu no wari long kava ya Jimmy... olsem wanem long sista blong yu?

Jimmy: Hem i stap long haos nomo. From?

Tony: Tru? Okay... yu no wari long kava ya.. Mi mi gat wan cigarette.. blong yu ya..Yu go smok aotsaed. Nogud ol boe oli luk mo oli karemaot.

Jimmy: Tank yu Tony!

Tony: Bae yu givim letta ya long Jennie... [*Hem i wokabaot i go. Jimmy hem i putum cigarette behane long sorae blong hem. Hem i stap aotsaed wetem. Merial i wokabaot i kam.*]

Merial: Jimmy! Yu luk Lizzie? [*Jimmy hem i hidim leta long poket.*]

Jimmy: Hem i stap wetem olfala man ya...: Yu wantem go luk hem?

Merial: Bae hem i kros...

Jimmy: Wanemi rong?

Merial: i no gat kerosene.

Jimmy: Yu no gat laet long haos?

Merial: No...

Jimmy: Yu wantem se mi sidaon wetem yu kasem taem we Lizzie... i kam aotsaed?

Merial: Okay.

Jimmy: Hem i frenem man ya?

Merial: Mi no save. Yu stap mekem wanem long ples ya?

Jimmy: Mi folem ol boe. No gat samting blong mekem long haos.. mi les.

Merial: Be Jennie i stap..

Jimmy: Hem i kros wetem mi. Mi faenem hem long haos.. hem i stap ridim wan magazine.. i bin talem se i gat ol gel band..

Merial: Wanem?

Jimmy: Grup blong ol gel we oli pleple musik.

Merial: Afta?

Jimmy: Mi bin talem long hem se hem i mas gat wan gel band mo bae Lizzie, Mary mo Flora i mas stap insaed.

Merial: Yu tru! Jimmy!

Jimmy: Be afta hem i no wantem mekem.

Merial: Hem i wan gudfala tingting Jimmy! Bae yumi go talem long olgeta!

Jimmy: Bae oli tink se yumi kranke!

Merial: Sapos we Lizzie i stap long wan band... Jimmy yumi mas talem long olgeta!

Jimmy: Yumi save go lukim ol gel tumoro...  
*[Jimmy hem i shruggem sholda blong hem. Ol boe oli wokabaot i kam nao, be tufala oli no lukim ol. Oli boe oli wokabaot slo slo blong mekem se oli no lukim olgeta.]*

Tony: Gel fren blong yu ah Jimmy!

Fred: Mifala i kasem yutufala stret!

Jimmy: Lego!

Leonard: *[Hem i kam klosap long Merial.]* Ahh.. smol sista blong Lizzie... Yu yu naes ah? Yu stap mekem sem wok olsem hem? *[Hem i laf.]*

Jimmy: Mifala istap stori nomo!

Fred: Stori long wanem?

Merial: Jimmy...

Tony: Yufala! Gel ya i stap fraet long yumi. Lego...

Leonard: Yu no wari long hem.. hem i save plante samting finis!

Jimmy: Go lus Leonard! *[Hem i pusum Leonard, mo Leonard i holem shirt blong hem. Merial hem i singaot.]*

Merial: Jimmy!

Fred: Jimmy! Jimmy oh!  
*[Ol boe oli laf. Lizzie mo Donal oli wokabaot i kam. Lizzie hem i luk Merial. Hem i ron i go long hem.]*

Lizzie: Merial! Yu stap mekem wanem long ples ya? *[Ol boe oli mov i go aot nao.]*

Merial: I no gat laet long haos. *[Lizzie hem i stap holem taet han blong hem.]*

Lizzie; Yu stupid! *[Hem i klosap slapem fes blong hem.]*

Merial: Ohhh!

Donal: Eh! Yu no kilim hem. *[Hem wokabaot i kam long smol gel.]*

Lizzie: Yu no tinkabaot wanem we i save happen long yu taem we yu wokabaot long naet yu wan?

Merial: Mi sori.. Mi bin stori wetem Jimmy.

Lizzie: Bae mi tekem yu i go bak long haos nao ya!

Donal: Wet.. ya... *[Hem i putum wan mani long han blong Merial. Merial hem i luk luk mani ya.]* Blong krismes... *[Lizzie hem i pulum Merial i go mo Donal hem i stap lukim hem. Jimmy i folem tufala i go aot.]*

*[Jennie hem i stap silip long bed blong hem.]*

Ol vois: Hey! Niufala band oli stap ple longwe! Grup blong ol gel!

*[wan recording i stap ple]*

Man.. Oli luk naes!

Oli pleple gud we...

Oli mo gud bitim fulap narafala band

*[Jimmy i ron i kam insaed long haos]*

Jimmy: Jennie.. Jennie...

*[recording blong ol vois i ple gogo long bihaen]*

Yufala i no save ple!

Oli spolem kastom!

Mo kalja!

Stopem ol nao ya!

Jennie: Ohh!

*[Hem i wek up nao.]*

Ohh! Ohh no!

Jimmy: Jennie...

Jennie: Jimmy?! Wanem taem ya? Yu mekem mi mi sek!

Jimmy: Sori be..

Jennie: Ol boe ya oli stap mekem ol nogud samting bakegen..

Jimmy: Mi mitim Merial...

Jennie: Merial?

Jimmy: Hem i bin kam long kava bar blong luk Lizzie. Jennie.. hem i laekem tingting blong mi. Yufala i mas kam wan band nao!

Jennie: Ohh Jimmy! Samting ya hemi... hem i no save happen!

Jimmy: Bae mifala i go talem long ol gel tumoro! .. Hemia.. *[Hem i droppem letta ya long bed.]*

Jennie: Ahh?

Jimmy: Tony hem i givim long mi..

Jennie: Tony. *[Hem i pikimap.]*

Jimmy: Gud naet Jennie...

Jennie: *[Hem i wokabaot i go. Jennie hem i pikimap letta ya, mo hem i openem.]*

Hmm!

*[Tony i singsing]*

Mi laekem yu long taem finis i kam...

Be mi no save gud yu!

Wan naet bae yu kam knok knok long do

Bae yu wet longatem tru!

Long niu yia ya, mi wantem gat wan stret gel fren blong mi..

I no mi! I no mi! I no mi!

*[Jennie i holem pepa long chest blong hem.]*

*[Tufala gel i stat blong singsing wetem Tony]*

Be hem i luk naes

Hem i stap tinkabaot yu

Bae yu wet kasem wotaem

Blong jusim wan stret man blong yu?

Ol narafala gel oli gat pikinini finis.

Bae yu wet kasem wotaem

Bifo yu jusim wan man blong yu?

*[Jennie hem i holem letta long chest blong hem. Letta i faldaon long graon nao.*

*Musik i stop nogud mo tufala gel oli ton mo luk olsem oli sori tumas.]*

*[ Ol boe oli stap wokabaot long rod. Oli karem wan ukelele.]*

Ol boe: 2004!

2004 i kam

I no gat wok

I no gat mani

Putum han long poket

Sakem smol watu

Blong talem happi niu yia

Long mifala evriwan!

Fred: Sakem smol watu!

Leonard: Shit!

Fred: No shit. Bae yumi traem ol bigfala haos longwe ..

*[ Nois blong singsing i kam narasaed.]* Wan mo grup bakegen!

Fred: Yumi stap karem smol from samting ya nao. Ol grup oli fulap tumas!

Leonard: Hu ya olgeta?

Tony: Kass....

*[Ol gel oli kam insaed. Oli stap singsing.]*

Ol gel: 2004! 2004!

Hip hip horray!

Bonne annee

Long yumi evriwan

Bonne annee

i stap kam

Bae laef i kam gud...

Ol boe: Bae laef i kam nogud!

*[Oli laf.]*

Fred: Yu stap mekem wanem long rod ya, long naet olsem Flora?

Flora: Mi stap singsing nomo!

Fred: Jimmy! Yu yu olsem wanem?

Jimmy: Mi oraet....

Fred:

*[Fred hem i putum han blong hem raon long sholda blong Jimmy.]*

Yu wetem ol gel ya.. yu wan bisi man ah?

Leonard: Yufala i stap win fulap mani?

Lizzie: No tumas.. ol man oli stap les long ol giaman grup olsem yufala!

Ol Boe: Ohhh!

Fred: Ol angel ya oli no misusem mani blong bonne annee! Bae oli pem flao blong jioj nomo!

Mary: Ale! Yumi go. Westem tumas taem blong toktok long ol kranke man olsem! *[Ol*

*gel oli stat blong wokabaot i go nao.]*

Tony: Olsem wanem sapos we yumi join tugeta? Daonem numba blong grup.  
Ol boe: Wanem?  
Mary: Hu bae i join wetem yufala, we yufala ol stilman nomo!  
Fred: Join wetem ol samting ya?!  
Tony: Wet wet wet! Hem i las naet blong bonne annee tunaet! Sapos yumi wantem winem fulap mani, yumi mas go raon tugeta!  
Jennie: Olsem wanem?  
*[Hem i stap askem ol gel.]*  
Flora: Long wan saed...  
Lizzie: Bae oli stilim evri mani ya!  
Tony: No kat! Yufala nao yu karem ol mani ya mo sharem aot!  
Ol boe: Tony! Ahh!  
Tony: Olsem wanem Jennie?  
Jennie: Bae yumi join wetem olgeta ono?  
Lizzie: Okay! Bae yumi traem...  
Tony: Okay? Bae yumi go long ol bik bigfala haos longwe. Ol man ya oli gat mani..  
*[Oli go aot mo oli singsing Zion.]*

*[Oli ron i kam insaed bakegen. Lizzie hem i ron i go folem Fred.]*

Fred: Oli givim mani ya long mi!  
Lizzie: Bae yumi sharem! Yumi agri finis!  
*[Ol narawan oli kam insaed.]*  
Tony: Fred!  
Fred: Mi stap pleple nomo! *[Hem i givim mani long Lizzie. Mo Lizzie hem i tekem.]*  
Mary: He yufala serem ol mani ya kwik, mi harem mi taet finis!.  
Fred: Yumi save gohed iet..  
Lizzie: Ol man oli stap silip! *[Hem i karem aot ol mani we i stap long bra blong hem, mo hem i stat blong kaontem. I gat sam coin mo sam smol not.]* Okay.. Ol mani ya nao..  
Mary: Man yumi wokabaot fulnaet blong smol mani ya.  
Fred: Lizzie hem i stap wokabaot from mani oltaem nomo! *[Hem mo Leonard oli laf]*  
Merial: Hao mas Lizzie?  
Lizzie: Tu taosan wan.....  
Tony: Yufala i stap afterem mani from wan samting Jennie?  
Jennie: Blong ol instruman... *[Ol boe oli sek.]*  
Fred: instruman?  
Leonard: Yu wantem ol intruman from?  
Lizzie: Bae mifala ol gel i kam wan band... traem...  
Flora: Wan band blong ol gel nomo!  
Tony: Giaman!  
Lizzie: Bae yu luk!  
Fred: Oli go kranke stret!  
Jennie: I no kranke! I gat sam gel band finis.  
Fred: Mi neva luk.

Leonard: Olsem wanem long Jimmy ya? Hem i wanem? Wan haf haf? [*Ol boe oli laf kranke.*]

Jimmy: Stupid!

Lizzie: No wari long hem Jimmy!

Fred: Band blong ol gel!?

Tony: Stringband ah? i gat stringband blong ol woman finis. long namatri i gat wan be yufala wan wanem.

Jennie: No.. elektrik band! Olsem Naio o Ironman!

Ol boe: Ohhhh! [*oli faldaon mo laf kranke*]

Fred: Yu no save pleple! Yu no save singsing! Hao nao bae yu kam wan band!

Mary: Yu tink se mifala i no save singsing? Bae yu harem mifala i no longtaem!

Lizzie: Ya.. wan tousan tri hundred blong yufala.. mo semak olsem blong mifala. [*Ol boe oli tekem mani ya.*] Ale bae yumi go nao. [*Ol gel oli traem wokabaot i go.*]

Tony: Ahh! Ahh! Ahh! Singsing firstaem! [*Ol boe oli blokem rod blong ol gel ya.*]

Lizzie: Mi les! Aot long rod!

Mary: Hey! Lego mi. Yu olsem wanem ya?

Flora: Mifala i wantem go nao!

Jennie: I let tumas...

Leonard: Yu talem se yu bae yu kam wan band! Be yu no save singsing long ol gudfala fren blong yufala?

Lizzie: Gudfala fren!? hu is save yufala?

Fred: sapos yufala i no watem singsing bae mifala i singaotem band blong yufalfa band blong ol nambut!

[*Ol boe oli laf.*]

Jennie: Okay... bae yumi singsing! Jimmy.. givim bit!

Jimmy: Ale!

Jenny: Ale! Wan tu tri!

Singsing:

Yu tink mi no save mekem?

Mi mas stap wetem yu!

Yu tink se mi no enaf blong stan up mi wan?

Boe yu yu rong!

Yu yu rong!

[*Ol gel oli i stap wokabaot i go long exit*]

Mi save go ahead!

Mi save faenem oan wei blong mi

Mi nomo nidim yu

Yu save lus!

Mi nomo wantem kri long naet

Harem nogud ful de

From ol giaman storian

We yu stap talem evri de

Yu no blokem mi

Blong wokabaot i go

Bae mi folem niufala rod!

Ale tata darling, tata darling

*[ol gel i ton raon i luk long trifala boe long medel blong staage we istap]*

Yu tink mi no save mekem?

Mi mas stap wetem yu!

Yu tink se mi no enaf blong stan up mi wan?

Boe yu yu rong!

Boe yu yu rong!

Boe yu yu rong!

Yu yu rong!

*[Trifala boe oli klap.]*

Fred: Oli save singsing.. smol.

Tony: Be olsem wanem nao bae yu kam wan elektrik band? Yufala i skul wea?

Leonard: Bae yufala ineva save faenem mani blong pem ol instruman!

Fred: Mi save, bae yufala i go stanap long rod!

Mary: Mifala winim sam mani finis taem mifala stap long bonne annee be yufala nao yufala go stanap long rod!

Leonard: Ahh! Yufala i no save wan samting!

Flora: Papa God bae hem i helpem mifala!

Leonard: Bae hem i daonem pris blong ol elektrik instruman?

Flora: Lukaot long ol toktok blong yu Leonard, bae i kaekae yu wan de!

*[Leonard hem i giaman blong sek sek.]*

Fred: Nem blong band blong yufala?

Jennie: Mifala i no putum nem iet..

Leonard: Fo gel mo wan haf haf!

Jimmy: Shurru! Yufala i stap jik oltaem!

Fred: Jimmy.. yu no kros! Yu no kros! Kam kam....Lego ol gel istap.

Jimmy: Bae mi folem yufala?

Fred: Yes...

Leonard: Yumi gat mani nao ya!

Jennie: Jimmy! Bae yu kam bak wetem mifala nao ya!

Fred: Yu no wari long hem! Hem i bigwan finis!

Jimmy: Mi no wan pikinini Jennie! Mi wantem folem ol fren!

Jennie: Sapos yu no kam bak nao ya, bae Daddy hem i wippem nogud yu!

Merial: Jimmy.....

Jimmy: Mi bae mi oraet!

Tony: *[Hem i pulum Jennie long fored, mo hem i toktok slo long hem.]* Jennie.. yu no wari. Mi bae mi lukaotem hem. Hey?

Jennie: Sapos eni samting i happen long hem, Tony...

Tony: Mi no save spolem smol brata blong yu.

Jennie: Yu no givim dring long hem Tony!

Tony: No kat! *[Hem i wokabaot i go bak long ol boe.]* Ale yumi go!

Leonard: Happi niu yia ol gel!

Ol boe: Happi niu yia!

*[Oli laf. Ol gel oli go aot.]*

Mary: Go hangem nek!

*[Ol boe oli laf.]*

Chorus: Ale!

Bae yumi ron from dring nao!

Long wan long ol ples

We oli open ful naet

Ale!

igat local rum mo whiskey

i gat alkol blong laet!

Bae yumi go dring longwe

*[Oli pusum dring i go long han blong Jimmy.]*

Jimmy: Givim long mi!

Bae yumi dring blong drong

Bae yumi lusim hed

Yumi evriwan!

No gat wok tumoro

No gat skul

No gat samting blong mekem

Ale!

*[Ol boe oli ron i go aot mo oli stap singaot.]*

*[Merial hem i kam insaed olsem we hem i tied tumas. Hem i stat blong swipim yad ya. Jimmy hem i wokabaot i kam. Ol klus blong hem oli fulap wetem ol hol. Mo hem i gat blad long fes blong hem. Hem i stap hid.]*

Jimmy: Merial... ssssss... Merial!

*[Merial i luk olabaot be hem i no lukim Jimmy.]*

Jimmy: Merial!!

*[Merial hem i stap wokabaot i kam kwik. Hem i lukim Jimmy mo hem i sek.]*

Merial: Jimmy!

Jimmy: Sssss!

Merial: Wanem i happen long yu?

Jimmy: Ol boe .. oli bin dring.. afta .. i bin gat wan faet... polis i bin kam. Oli kilim nogud mifala...

Merial: Oli karem yu long numba 6 Jimmy?

Jimmy: Mi faldaon long graon afta mi rol i go long bus.. oli no bin tinkabaot mi, taem we oli karem ol narafala boe i go. Phewww...wota.. mi mas dring wota ..

*[Merial hem i pulum Jimmy i go long ples we wota i stap long hem. Jimmy hem i dring mo hem i sidaon.]*

Merial: Yu go long haos finis?

Jimmy: Bae oli wipim mi sapos we oli faenem aot se.. mi fraet blong go bak nao.

Merial: Yu mas go bak long haos samtaem.

Lizzy: *[Off stage.]* Merial!

*[Jimmy hem i girap olsem we hem i wantem ronwei.]*

Merial: Jimmy!

*[Lizzy hem i wokabaot i kam insaed.]*

Lizzy: Jimmy!?

Merial: Oli kilim nogud hem...

Lizzie: Yu folem ol kranke boe ya afta..?!

Jimmy: Yu no save tok long mi Lizzie!

Lizzie: Mi save tok long yu! Mi save kilim nogud yu tu!

*[Hem i go blong kilim hem.]*

Merial: Lizzie!

Lizzie: Yu mekem wanem Jimmy?

Jimmy: Mifala i no mekem wan samting nating! Polis nao oli kam kilim mifala..

Lizzie: Yu no giaman long mi Jimmy! Mi no wan stupid!

Jimmy: Oli kilim nogud ol boe ya...ino stret!

Lizzie: Mo gud oli kilim olgeta i ded! Aotem sam doiti long wol ya!

Merial: Lizzie...

Lizzie: *[Hem i girap blong go nao.]* Klinim ol kil blong hem Merial! Afta yu.. yu go bak long haos! *[Hem i wokabaot i go.]* Bae mi mi talem long Jennie wanem we i bin happen long yu!

*[Hem i go aot nao.]*

Jimmy: Ol gel oli neva mekem eni nogud samting!

Merial: No.. be..

Jimmy: Yu yu tink se mi mi nogud ah Merial?

Merial: No Jimmy. Be from wanem nao yu no kam bak wetem mifala? Yu save se bae ol boe oli dring.

*[Hem i stat blong klinim ol kut blong hem.]*

Jimmy: Mi no wan pufta blong folem ol gel oltaem! Awe! Merial!

Merial: Sori Jimmy... Be yu yu laekem blong stap wetem ol boe ya?

Jimmy: Oli kranke.. oli no fraet long eni samting. Polis i save wippem ol gogo.. be bae oli mekem sem wok nexis wikend.

Merial: Yu bae yu mekem olsem Jimmy?

Jimmy: No gat narafala samting blong mekem..

*[Merial i klinim wan gat we i so we i so.]*

Merial! i so!

Merial: Bae yu sik, sapos mi no klinim!

*[Hem i go ahed blong klinim gat blong hem.]*

*[Ol gel oli kam insaed bak insaed. Mary hem i karem wan ukelele. Jennie hem i gat wan bigfala box. ]*

Jennie: Ol elektrik samting oli sass tumas..

Lizzie: Bae yumi stat smol.

Flora: Ol man oli laekem ol string band.

Jennie: Yumi bin talem ol boe se bae yumi kam wan elektrik band. Bae oli jikim yumi gogo.

Lizzie: Yu no wari long ol boe!

Flora: String band i gud nomo! *[Hem i singsing nao ya.]*

Mi wantem wan niufala dress

We kula blong hem i naes!

Bae yu pem dress blong mi

Long numba 30

Yu no wari long pris blong hem

Bae yu harem gud nomo

Taem yu lukim woman blong yu

Long wan niufala.. dress!

Jennie: Yeah! Naes wan Flora!

Lizzie: Bae yumi pleple long wan hotel.. fulap string band ol stap ple long ol hotel..

Mary: Bae yumi danis [*Hem i sek sekem hips blong hem.*] Tahitian style!

Flora : Oh no! Mi no save mekem kaen olsem!

Lizzie: Phewww!

Auntie: Flora! Hey! Yu karem ol samting ya wer?

Flora: Mifala.. i wantem kam wan band auntie. Wan string band.

Auntie: Tru! Yu save plem ol samting ya nao? Guitar.. ukelele?

Mary: Auntie, mifala save pleple be smol nomo!!

Lizzie: Mifala i save ple Auntie! nambawan!

Auntie: Flora.. gel blong mi.. bae band blong yufala i kam singsing long jioj!

Lizzie: Wanem?

Auntie: Yufala i kam singsing! Long sunde ya nao! Yu singim ol gudfala christain singsing.. Ol gel! Bae yufala i putum ol naesfala aelan dress! Yufala i no save dress up olsem blong kam long jioj!

Flora: Yes Auntie!

Auntie: Bae mi talem long olgeta woman se bae yufala i kam. igud se oli lukim ol gel oli mekem ol gud gudfala samting! Plante gel oli stap folem rod nomo tede.. be yufala nao yu gat wan gudfala tintink!

Flora: Tank yu Auntie..

Auntie: Seves i stat long eight oklok stret! [*Hem i ron i go aot.*]

Lizzie: Flora!

Flora: I gud ah? Bae yumi ple!

Mary: Yumi wan band blong jioj nao.

Lizzie: Mi no wantem!

Flora: Sapos yumi no ple ple long jioj ya bae yumi pleple wer?

Jennie: Okay! Bae yumi traem!

Lizzie: Kass...

Mary: Bae yumi traem Lizzie!

Jennie: Yumi gat klosap wan wik iet bifo sunde i kam. Bae yumi praktis stat tede.. fo oklok! Evriwan bae i kam long taem!

Lizzie: Yes boss!

Jennie: Bae yumi ple long jioj ya.. mo bae yumi ple gud!

Lizzie: Pheww...

[*Ol gel oli wokabaot i go.*]

[*Ol boe oli wokabaot i kam. Oli gat fulap kil mo ol klus blong olgeta oli gat fulap hol. Fred hem i helpem Leonard iwokabaot.*]

Leonard: Awee...

Fred: Tut i lus ah Leonard?

Leonard: Mi swollem daon.  
Fred: Kass....  
Tony: Sapos wan long ol polis i kam long ples ya...  
Leonard: Bae mi kilim ded hem!  
Fred: Mi nidim wan cigarette..  
Leonard: Bae mi go silip... [*Hem i harem nogud.*] Hed i so tumas... [*Jimmy hem i wokabaot i kam. Hem i lukim ol mo hem i sek.*]  
Fred: Hey Jimmy! Wanem i rong?  
Jimmy: No gat samting...  
Leonard: Smol pufta ya hem i fraet blong kam klosap long yumi nao.  
Fred: Hey Jimmy... Yu yes! Yu wan strong man! Yu luk polis i kam, mo yu ..... [*Hem i mekem sign wetem han blong hem se Jimmy i ronwei.*]  
Jimmy: Mi faldaon...  
Tony: Jennie i talem wanem taem we yu kasem haos. [*Leonard mo Fred oli lukim olgeta.*]  
Jimmy: Hem i kros...  
Tony: Hem i talem wanem?  
Jimmy: No gat samting..  
[*Tony hem i holem hem.*]  
Tony: Hem i talem wanem?  
Jimmy: Hem i no save trustim yu nating.  
Fred: Tony! Mi no save trustim yu nating! Yu stap tinkabaot dring nomo!  
[*Fred i stap giaman se hem i Jennie mo Leonard hem i stap laf long hem.*]  
Leonard: Sarem maot blong yu darling, o bae mi mek save yu ya!  
[*Tony hem i ronem Leonard mo Fred mo oli go aot.*]

[*Jennie hem i stap sidaon long bed blong hem., hem i gat wan pen mo wan pepa. Hem i stap raetem daon ol nem blong grup.*]

Jennie: Dolly gel.. No! Umm... wanem bakegen.. sista samting?! Sista kam antap.. no.. ohh.. sistas tugeta! Ummm.. Reggae Sistas? Mi les... Saon sistas? Solid sista? Ohhh! [*Hem i rolem hem i go raon. Tony hem i stap klosap long hem i stap lisen. i gat wan knob long kupa. Jennie hem i girap.*] Hu ya?

Tony: Solid sistas i gud.  
Jennie: [*Hem i girap kwik.*] Yu! Yu no sem?! Go lus!  
Tony: Wet! Wet smol.... Bae mi talem wanem we i bin hapen..  
Jennie: Yu bin promis blong lukaotem Jimmy! Be yu stap tinkabaot dring nomo. Yu no gat wan narafala tingting long hed blong yu!  
Tony: I no tru Jennie!  
Jennie: Ahh!  
Tony: Sapos we yu talem se yu laekem mi Jennie..  
Jennie: Bae yu jenisim laef blong yu? Yu tink se mi wan stupid? [*Tony hem i holem hem nao ya.*] Lego mi.  
Tony: Mi sori.. i no falt blong mi.. Mi no bin wantem kasem ol kil ya tu. Luk... [*Hem i holem tshirt i kam antap.*]  
Jennie: Ohh... from wanem yu go ahed blong dring Tony?  
Tony: Mi tink se bae mi stopem .. be taem we wikend i kam...

Jennie: Yu mas folem ol boe.  
Tony: Sapos we mi gat wan gelfren we hem i laekem mi...  
Jennie: Tony!  
Tony: Yu wantem wan man we hem i gat wok.. mo mani long poket blong hem?  
Jennie: I no olsem...  
Tony: Yu no gat wok! Be yu save faenem wan man blong lukaotem yu! [*Jennie hem i luk luk daon.*] Be mi mi wan samting nating nomo. Polis oli kilim nogud mi.. evriwan i stap glad from! Gud sapos mi ded samples long rod...  
Jennie: No Tony..  
Tony: Yu no save laekem wan man olsem mi Jennie! Yu talem finis! ..... Mi wantem yu Jennie.. mi wantem yu tumas.  
Jennie: No Tony...  
Tony: Yu save trustim Jennie.. Yu no fraet.  
Jennie: Tony...  
*[Ol laet oli go aot.]*

*[Pastor wetem ol congregation oli kam insaed long stage, we hem i stan up wetem bibol long han blong hem.]*

Pastor: Yumi stap long wan rabis wol tede! Mo yumi ol man mo woman, yumi stap swim long doiti wota blong sin!

anti: haleluia

Pastor: Taem we Papa God hem i bin mekem firs man mo firs woman, oli bin klin i stap.. Oli bin gat wan isi laef nomo long karen blong Papa God! Papa God i bin givim evrisamting long tufala! Evrisamting!

Wom: Tank yu Papa God!

*[Laet i shine long ol audience mo long ol gel we oli sidaon wetem gitar mo ukelele. Lizzie hem i stan up olsem we hem i no wantem stap nating.*

Pastor: Wan de serpent ya i bin talem long Eve, 'testem fruit ya.. testem fruit ya we Papa God hem i putum tabu long hem!

Ol: Ohhh!

Pastor: Mo yu save wanem? Eve i bin kakae! Hem i brekem tabu we Papa God i bin puttum! Hem i ron i go long man blong hem Adam, mo hem i forseem Adam blong kakae!

anti: Awe!

Pastor: Yufala ol woman! Yu karem mak blong woman ya Eve! Ol woman nao oli stampa blong ol nogud samting w i stap happen long wol ya!

Lizzie: Ahh!

Flora: Ssssss!

Pastor: Ol rabis fasin oli stap kam antap bigwan. Ol woman oli stap wokabaot long naet! Oli dring.. oli go long ol kava bar! Oli folem rod nomo nao....

Pastor: Sapos we igat wan woman o wan man we i stap long jioj ya, we hem i wantem askem help o forgiveness blong Papa God, bae hem i stan up mo toktok nao ya! Bae Papa God i save forgivim hem iet!

Wom: Helpem mi Papa God! Man blong mi hem i stap dring kava evri naet. Afta mifala i no gat mani blong putum kakae long maot blong ol pikinini! Mekem hem i luk save se famili hem i firs samting .. mo doti wota ya i mas kam afta!

Ol wom: Amen!

Pastor: Tank yu sista... Olgeta! Mi wantem tekem smol taem blong welkamem wan grup blong ol woman we oli kam blong liftimup servis blong yumi tede nao! Bae mi askem olgeta blong singim wan singsing blong yumi nao ya.. Ol gel, yufala i redi?

Flora: Tank yu Pastor....Mo tank yu olgeta evriwan long servis ya. Mifala nao wan band blong ol woman, we i stat long manis ya nomo. Mi hope se bae yu laekem singsing ya. Ale...

*[Lizzie hem i stat long singsing hem wan ol nara gel oli sek]*

Lizzie: Yu stap pointem finga!

Yu stap talem se mi nao mi karem mak blong Eve!

Yu no tinkabaot

Toktok blong Jesus

De we ol man oli stonem woman ya?

Yu we i sakem firs ston

Yu no mas gat sin

Yu we i sakem firs ston

Yu no mas gat rabis tingting!

Yu we i sakem firs ston

Yu no mas gat sin

Yu we i sakem firs ston

Yu no mas gat rabis tingting!

Plante man mo woman oli fraet blong kam long jioj!

Bae ol pastor oli talem se

Olgeta nao i stihl

Mekem ol rabis samting!

Pastor talem tru

Yu nao yu no gat sin?

Yu neva bin mekem samting we yu stap sem long hem?

Hu bae i sakem firs ston?

Hu bae i sakem firs ston?

*[Singsing i finis. Ol man oli no save wanem blong mekem. Sam ol klap sam oli stap kwaet. Be ol ston oli kilim ruf mo ol dronk boe oli singaot aot. Evriwan oli sek.]*

Pastor: Sunde tede ! Long de blong Papa God, sam man oli stap mekem ol rabis fasin iet!

*[Mo ston oli faldaon. Evriwan oli bend daon mo ol laet oli go aot.]*

*[Ol boe oli kam insaed nao ya. Oli drong mo oli karem ol bottle dring.]*

Leonard: Wee hee!

*[Hem i sakem ston. Mo hem i laf.]*

Tony: Leonard! Yu kranke! Stop! Stop nao ya!

Leonard: From?

Tony: Ol man oli stap long jioj ya!

Leoanrd: Ol woman nomo.. wetem pastor!

Fred: Pastor, prija... mi no kaontem wan man!

Tony: Bae hem i singaotem polis!

Leonard: Bae oli wipim yumi bakegen!

*[Oli ron i go mo oli faldaon long wan hip. Oli stap laf kranke.]*

Jennie olgeta ol stap oli stap singsing insaed! Oli sek nogud we!

Tony: Givim bottle i kam.

*[Hem i dring.]*

Fred: Yu no wantem se Jennie itingting nogud long yu, ah Tony?

Tony: Stap kwaet!

Leonard: Hem i kam woman blong yu finis?

Tony: Hem i bin folem mi.. long smol bus longwe ...

*[Ol boe oli hang long ol toktok blong hem.]*

Atink mi nao firs man blong hem.

Leonard: Firs wan be no las wan....

Tony: Hem i no olsem tu!

Fred: Ol gel oli olsem Tony! Yumi no save trustim ol nating!

Leonard: Oli testem samting ya.. afta oli go kranke from.

Tony: Shuttem bigfala maot blong yu!

Fred: Lukaot Leonard! Hem i kros!

Leonard: Jennie i talem wanem long yu Tony?

Fred: Tony darling.. mi mi laekem yu tumas!

*[Hem i giaman se hem i Jennie.]*

Kam!

Tony: Stupid! *[Hem i faetem hem nao.]* Yutufala i no stap jikim mi.

*[Oli gohed blong faet, be oli faldaon long wan ples we Malcolm hem i stap long smol bus wetem wan gel.]*

Malcolm: Hey! Yufala i kranke o wanem? [

*Ol boe oli sek mo oli stopem blong faet. Gel hem i harem nogud.]*

Gel: Malcolm...

Malcolm: Yu go.. yu go. Ol boe ya oli nogud.

*[Hem i pusum gel ya i go aot.]*

Gel: Bae yu kam luk mi bakegen...

Malcolm: Bae mi kam luk yu! No wari...

*[Gel ya hem i ronwei.]*

Fred: Man ya! Malcolm!

Tony: Hu ya gel ya?

Malcolm: Yu no wari long hem...

Leonard: Yu yu stap stilim ol woman olabaot, mo woman blong yu hem i stap singsing long jioj ya!

Malcolm: Yufala ol boe yu stap disturb tumas! Hem i sunde ya!

Fred: De blong spel! Mifala i stap spel!

Tony: Ya..

*[Hem i givim bottle long hem.]*

Malcolm: Alkohol blong laet?!

Fred: Mifala i mixim gud Malcolm... fulap jus i stap insaed long plastik ya! Fulup!

Leonard: Mifala idring delaet!

Malcolm: Olsem evri wikend.

Fred: Mifala ilaekem alkol, mo yu ... ol woman!  
*[Malcolm hem i laf mo hem i dring.]*

Tony: Wanem tingting blong yu long saed blong ol gel ya?

Malcolm: Ol gel wer?

Tony: Jennie, Mary, Flora mo Lizzie.. tingting blong olgeta.

Malcolm: Wanem tingting bakegen?

Fred: Bae oli kam wna band. Wan band blong ol woman.

Malcolm: Ahh?

Leonard: Olsem Naio o Ironman!

Malcolm: Wer nao yu yu harem kranke toktok olsem?

Tony: Oli bin talem stret long mifala... taem blong bonne annee. Oli bin go raon blong winnim mani blong pem ol instruman..

Malcolm: Mary i neva talem wan samting nating long mi! Wan band!?

Tony: Yu no laekem tingting ya?

Malcolm: Hu i talem long woman blong mi se hem i save mekem samting ya?

Tony: Yu no bin save wan samting?

Malcolm: Bae mi talem long hem blong stopem samting ya nao ya!

Tony: Be..

Fred: I gud yu blokem hem Malcolm!

Leonard: Ol gel ya oli bikhed tumas.

Fred: Ol gel nao oli blong stap long haos.. i no wokabaot olabaot!

Malcolm: Ale! *[Hem i givim bak bottle mo hem i go.]*

*[Ol gel oli wokabaot i go long aelan dress we oi bin werem long jioj. Merial mo Jimmy oli stap folem olgeta. Flora hem i kros.]*

Merial: Ol men oli sek from singsing ya!

Jimmy: Oli sek bakegen from ol ston we ol boe oli sakem long jioj ruf!

Mary: Ol boe oli no gat respek nating!

Flora: Mi no glad nating long singsing ya Lizzie! Yu no bin talem se bae yu singim kaen singsing olsem!

Lizzie: Wanem i rong?

Flora: Laki se ol boe ya oli mekem problem.. sapos no bae pastor hem i ronnem yumi long jioj ya!

Mary: I no tru.. plante man oli bin laekem singsing blong Lizzie ya!

Flora: Singsing ya i talem se ol pastor oli dubolfes!

Jennie: Flora... singsing ya hem i tokabaot wan storian we i stap long bibol..

Flora: Mi no interest nating long band ya! Yu save go ahed yufala nomo!

Merial: Yu no mas lego band ya Flora!

Flora: Mi bae mi aot!

*[Auntie we hem i bin askem ol blong singsing hem i wokabaot i kam afterem ol gel. Hem i stap pulum win lelebet.]*

Auntie: Ol gel! Ol gel.... Ohh.. Flora! Kam ya! *[Flora hem i wokabaot i kam bak, olsem we hem i fraet smol.]*

Flora: Auntie. Singsing ya, i no tingting blong mi..

Auntie: Hem i tingting blong hu?

Lizzie: Mi nao..

Auntie: Mi neva harem kaen singsing olsem long jioj.... [*I no klia se hem i kros o no.*]  
Hem i challengim mifala lelebet. Fulup man oli nomo kam long jioj nao.. Mifala  
imas tinkabaot. Tank yu ol gel... [*Hem i sek han wetem ol.*] Tank yu Lizzie... Yu  
mas go ahed olgeta!

Flora: Go ahed?

Auntie: Wetem band ya!

Jennie: Tank yu! [*Hem i kisim hem.*]

Auntie: Bae yufala i go from kompetition ya?

Jimmy: Kompetition?

Auntie: Mi ridim long niuspepa ..... i gat kompetiton blong ol band. Oli mas kam up  
wetem wan niufala singsing. Bae oli faenem aot wanem band long taon ya hem i  
mo gud! Yufala nao i mas stap insaed long kompetition ya.. blong shoem aot yumi  
ol woman!

Jennie: Yu tru Auntie?

Auntie: Yes!

Lizzie: Yu gat pepa ya i stap iet Auntie?

Auntie: Atink.... Jimmy, yu bae yu kam wetem mi, bae mi givim pepa ya long yu. [*Hem i  
wokabaot i go.*]

Jimmy: Be..

Jennie: Jimmy! Yu go!

Jimmy: Ohh...

Merial: Ale! Yumi go Jimmy! [*Merial hem i ron i go folem Jimmy.*]

Lizzie: Kompetition?!

Jennie: Lizzie! Chanaes blong yumi i kam!

Mary: Yumi mas lukaotem wan narafala woman. Flora hem i nomo wantem stap wetem  
yumi.

Lizzie: Mi save wan gel we...

Flora: Wet... No.. mi wantem stap insaed long band ya iet! Be yumi no mas singim ol  
kaen singsing we i mekem ol man i kros!

Mary: Kross?!

Lizzie: Bae yumi singsing long ol naesfala boe, we oli stap olabaot long ples ya..

Flora: Mi no minim se...

Lizzie: No! Bae yumi singsing olsem...  
Vanuatu!  
Ples we mi mi laekem tumas  
' Wit sanbij mo blu blu skae!

Flora: Yu save wanem we mi minim Lizzie! [*Jimmy mo Merial oli kam insaed wetem  
wan niuspepa. Ol gel oli ron from*] Bae mi luk!

Lizzie: Ohhh... yes! Afta nekis manis! Yumi gat taem blong praktis!

Jennie: Tinkabaot.. sapos we yumi save winnim kompetition ya! Bae ol man oli harem  
save long yumi!

Singsing:  
Samting blong kasem nao  
Samting blong kasem!  
Chanaes blong yumi nao

Bae yumi mekem!

Yumi mas wok from

Stat long tede

Yes stat long tede!

*[Jimmy mo Merial i kam insaed wetem niuspepa mo luk long hem.]*

Oli talem wanem?

Oli talem se..

Merial: *[Hem i ridim niuspepa.]* Ol elektrik band nomo!

Ol: Ohh no!

Lizzie: Mi save wan man we hem i save helpem yumi!

Jennie: Yu tru Lizzie?!

*[Ol laet oli go aot mo Lizzie hem i wokabaot i go long ples we kava bar i stap long hem. Hem i luk Donal i stap sidaon, mo hem i stap stori wetem wan man. Hem i wokabaot i go kasem hem.]*

Donal: Yu luk jif.. ol samting i stap go nogud from wei we ol man oli ronem kaontri ya..

Jif: Hem i tru nomo.

Lizzie: Donal...

Donal: Lizzie?!

Jif: Hmmm... *[Donal hem i stan up mo hem i folem Lizzie i go.]*

Lizzie: Donal.. yu nomo yu save helpem mi...

Donal: Olsem wanem?

Lizzie: Yu nao yu bin pem ol instruman blong Ironman?

Donal: Afta?

Lizzie: Bae yu askem ol sapos we mifala i save usum ol instruman blong olgeta? Wan aftanun long wan wik nomo..

*[Donal hem i no save wanem blong mekem, afta hem i laf we hem i laf. Laet i go aot. Lizzie hem i ron i go blong joinem ol gel bakegen.]*

Lizzie: Yumi save usum ol instruman blong ol long tursde!

Jennie: Tursde!

Bae yumi faenem wei!

Bae yumi wok from

Praktis long tursde!

Samting blong kasem nao

Samting blong kasem!

Chanaes blong yumi nao

Bae yumi mekem!

Yumi mas wok from

Stat long tede!

Yes stat long tede!

*[Ol gel oli raisemap han blong ol mo freeze]*

INTERVAL

*[Ol laet oli kam up bakegen. Olgeta musician i kam long stage mo oli pikimap ol instruman blong olgeta. Sam musician i stap insaed wetem Donal.]*

Donal: Tank yu! Tank yu tru! Bae oli kam i no longtaem.

Man 2: Oli hu ya?

Lizzie: *[Hem i stap wokabaot i kam wetem Merial.]*

Donal! Evri samting hem i oraet?

Donal: Lizzie! Merial... yu luk naes tede. Hu i mekem hair blong yu? *[Hem i tajem hair blong hem.]*

Merial: Lizzie...

Man 2: Yu nao yu stap singsing?

Lizzie: Mi stap ple long band ya.

Man 2: Wanem band?

Lizzie: Solid sistas.

Donal: Ol gel ya oli stap pleple musik tugeta!

Man 2: Kass....*[Jennie hem i wokabaot i kam.]*

Merial: Jennie!

Jennie: Merial.. olsem wanem?

Merial: Werum Jimmy?

Jennie: Bae hem i kam. Gud aftanun Donal... helo olgeta!... *[Hem i go sek han wetem Man 2.]* Tank yu tru blong letem mifala i kam usum ol intruman ya.

Man 2: No problem...

Jennie: Yu yu gat evri samting...

Man 2: i no evri samting.. Mifala i nidim sam mo samting iet.. Ah Donal?

Donal: Ahh.. yes yes!

Man 2: Hao mas blong yufala long band ya?

Jennie: Mifala fo evriwan.

Man 2: Yu save hao blong wokem ol samting ya?

Lizzie: Be yes! *[Jennie i luk luk hem.]*

Man 2: Okay.... *[Hem i wokabaot i go.]* Lukim yufala! *[Hem i go aot nao. Donal hem i go sidaon wetem Merial. Hem i stap lukim ol skul buk blong hem.]*

Jennie: *[Hem i go stan up klosap long Lizzie.]* From wanem nao yu talem se yumi save mekem samting ya! Mi no save nating!

Lizzie: Sapos we ol boe ya i save mekem, yumi ol gel yumi save!

Jennie: Lizzie....

Flora: *[Hem i stap ron i kam long aelan dress blong hem.]* Ohh Sori! Mi let lelebet.

Donal: Yufala imas kam long taem.. yu gat sot taem nomo blong praktis.. Ale Merial bae yumi go sidaon longwe...

Lizzie: Yumi stap westem taem!

Flora: Ohhh! Drum.. wan drum we... i naes tumas! *[Hem i go tajem drum ya.]* Papa God.. tank yu..

Lizzie: I no kaka! Yu no nid blong gres long hem. *[Hem i lukim Merial i sidaon wetem Donal mo tufala istap lukim ol skul buk.]* Merial!

Merial: Yes?

Lizzie: Yu go long haos. Mekem hom wok blong yu!

Merial: Mi wantem stap!

Lizzie: Yu stap humbug tumas!

Donal: Yu no kros tumas wetem hem Lizzie.. mi stap lukim ol skul buk ya. Hem i wan kleva gel stret!

Lizzie: Yu mas mekem evri skul wok blong yu Merial! Yu harem? Yu no save talem se yu tied taem we yumi kasem haos.  
*[Merial hem i pikimap ol buk blong hem. Jimmy hem i wokabaot i kam wetem ukelele.]*

Jennie: Werum Mary?

Flora: Mi no luk hem nating long wik ya.

Jennie: Jimmy yu luk Mary long rod ya?

Jimmy: No kat.

Jennie: Hem i save se yumi stap praktis tunaet! Hem i stap mekem wanem?

Lizzie: Ale! Yumi go ahead!

Jennie: Be ... *[Ol gel oli go from ol instruman nao ya. Oli pikimap ol guitar mo oli traem ple, be i no gat wan nois i kam aot.]*

Flora: Hao nao bae yumi mekem ol samting ya i wok?

Lizzie: Hmm... Bae yumi mekem wanem nao Jennie?

Jennie: Askem ol boe ya..

Lizzie: Bae yumi luk olsem ol stupid nomo!

Flora: Be hao nao..?

Jennie: Traem luk se rop blong ol samting i go wer! *[Jimmy hem i kam antap blong helpem ol.]*

Flora: Ol rop?

Lizzie: Samting ya nao, Flora, nem blong hem rop! *[Lizzie hem i stap holem rop ya.]*

Flora: Ohh.. samting ya nao?

Lizzie: Yes!

Donal: Oli no save wan samting nating! *[Hem i putum hed blong hem klosap long Merial.]*

Lizzie: Folem rop i go! *[Oli stap folem ol rop. Jimmy hem i kasem amplifier bifo we olgeta oli kasem.]*

Jimmy: Yu mas onem samting ya firstaem! *[Ol gel oli luk hem mo oli kros.]* Yufala ol gel!

Merial: Lizzie hem i no save hao blong mekem samting ya nating!

Donal: Hem i no skul gud olsem yu ah?

Jimmy: Traem pleple! *[Oli go tajem ol instruman mo oli ple nao.]*

Lizzie: Mi bin talem se yumi save wokem!

Jennie: Ale!

Singsing:

Yu yu sori nao!  
 Yu yu sori from fasin ya  
 Yu yu sori nao  
 I let tumas my dear  
 Mi bin lavem yu  
 Mi bin givim hat blong mi  
 Be yu bin wantem  
 kontrolem evri mov blong mi!  
 Yu yu sori nao!  
 Bae yu jenisim fasin blong yu  
 Mi mi sori se  
 Mi mi no bilivim yu

Mi bae mi lego yu nao  
Mi lego yu tede  
Yu save wasem oan klos blong yu  
Mo kukum oan kakae tu  
Yu yu sori nao

*[Donal, Jimmy mo Merial oli klap. Mary hem i wokabaot i kam. Ol gel oli luk hem. Han blong hem i stap long plasta.]*

Merial: Mary...  
Lizzie: Wanem i hapen?*[Trifala gel oli kam daon blong luk hem.]*  
Jennie: Mary yu oraet?  
Mary: Mi faldaon.  
Lizzie: Yu faldaon?  
Mary: Mi kam nomo, blong talem se mi no save ple. Han i nogud. *[Ol gel oli lukim olgeta.]*  
Flora: Olsem wanem long competition ya Mary?  
Mary: Mi no save. Mo gud yu faenem wan narafala gel blong tekem ples blong mi.  
Flora: Yu save singsing iet!  
Mary: Mi no wantem.  
Lizzie: Malcolm i blokem yu ah?  
Mary: I no bisnes blong yu tu!  
Lizzie: Yumi evriwan i bin agri se...  
Mary: Mi jenisim tingting blong mi finis!  
Jennie: Hem i brekem han blong yu, blong mekem se yu no save ple..  
Mary: Mi faldaon!  
Lizzie: Bae yu letem hem i mekem olsem long yu foreva Mary?  
Mary: Ol problem ya oli stat from mi stap folem ol woman olsem yu!  
Lizzie: Mi nao mi olsem wanem?  
Mary: Yufala i no sem blong stap folem wan kaen woman olsem....  
*[Lizzie hem i ron i go kase Mary, blong kilim hem.]*  
Jennie: Lizzie! Mary!  
Flora: No kilim hem...! *[Flora hem i ron klosap long tufala.]*  
Jennie: Jimmy! Stopem tufala!  
*[Jennie hem i holem wan long tufala, mo Jimmy hem i holem narawan.]*  
Jimmy: Slo daon Lizzie!  
Mary: Ol kranke toktok blong yufala nao i mekem Malcolm hem i kilim nogud mi!  
Lizzie: Ahh.. hem i kilim yu ah? Yu no bin faldaon!  
Mary: Hem i kros from mi no bin talem eni samting long hem! Hem i sek taem we hem i faenem aot se yumi stap ple tugeta!  
Lizzie: Hem i neva mekem eni samting we yu no save long hem..  
Mary: Yu minim wanem?  
Lizzie: Hem i stap afterem ol gel oltaem!  
Mary: Yu! *[Hem i traem faetem Lizzie bakegen.]*  
Jennie: Lizzie! Enaf! Sapos we Mary hem i wantem aot long band ya, okay! Letem hem i go!

Mary: Hu ya ol gel ya?  
Lizzie: Hem i bin afterem mi mi! Hem i save se mi nao fren blong yu..  
Mary: Yu nao yu mekem hed blong ol man i go kranke!  
Donal: Merial! Yu kam wetem mi nao ya! i nogud yu lukim samting ya. Bae mi tekem yu long haos.  
Merial: Mi no..  
Donal: Bae yu kam! *[Hem i pulum Merial i go. Ol buk blong hem i stap long graon. Jimmy hem i lukim tufala i go.]*  
Mary: Bae mifala ol woman i ronnem aot yu long taon ya wan de Lizzie! *[Mary hem i pull kwik mo Jennie i lego hem. Mary hem i traem kilim Lizzie wetem plaster we i stap long han blong hem.]*  
Lizzie: Letem bastard man ya i kilim hem i ded!  
Jennie: Mary! No! Mary!  
Lizzie: Bae mi no save wok sapos we ol man oli no pem mi from!  
Mary: Bastard! *[Hem i aot long han blong Jennie mo hem i jump long Lizzie. Ol laet oli go aot.]*

*[Donal hem i stap pulum Merial i go.]*

Donal: Ale yumi go! Nogud yu harem ol rabis toktok we Mary i stap sakem long sista blong yu!

Merial: Be Lizzie...

*[Merial hem i traem go bak.]*

Donal: No no no! Lizzie bae hem i oraet. Yu kam wetem mi!

*[Merial hem i stap kwaet. iklir se hem i fraet.]*

Donal: Yu fraet long mi?

*[Hem i laf.]*

Merial! Yu tink se bae mi mi mekem wanem long yu?

Merial: Mi no..

Donal: Yu save se mi nao mi wan gudfala fren ..... Mi olsem wan papa blong yu. *[Hem i putum han blong hem long solda blong Merial.]*

Merial: Lego!

Donal: Mi stap mekem wanem we i nogud!?! Okay! Okay! ..... Yu stap! Mi bin wantem givim han nomo! Mi bin luk se yu yu stap harem nogud.. mi stap tinkabaot yu nomo.. be ... *[Hem i luk olsem we hem i harem nogud tru. Merial hem i mov i go mo klosap long hem.]* Yu stap! Sapos we yu fraet blong wokabaot wetem mi! Yu stap nomo! Yu tink se mi olsem wanem? Yu tink se bae mi mekem wan nogud samting sapos we yu stap yu wan?

Merial: Mi no minim blong ... mi no tink se bae yu mekem wan nogud samting..

Donal: Yu stap tingting nogud long ol man!

Merial: Mi sori...

Donal: Hmm.... Okay! Okay! Fogetem!

Merial: Lizzie hem i bin talem se.. bae mi no letem eni man i .. tajem mi.

Donal: Yu bin gat wan had laef tru ah Merial?

Merial: No..

Donal: Pheww... kam sidaon. Mi wantem save mo abaot laef blong yu. Kam... *[Hem sidaon be hem i stap longwe lelebet long Donal.]* Yu gat hao mas yia Merial?

Merial: Thirteen.

Donal: Thirteen? Yu luk mo olfala lelebet.  
Merial: Mi no save...  
Donal: Yu laekem tumas skul blong yu ah?  
Merial: Mi laekem skul!  
Donal: Ah ting yu wan gudfala student ah? Ol tija oli laekem yu? Yu stap kasem top mak long ol test blong yu?  
Merial: Samtaem.. yes.. samtaem mi winnim ol gudfala mak.  
Donal: Kud! Kud! Yu wantem mekem wanem wetem ol save ya Merial? [*Hem i kam klosap mo long hem.*]

Yu wantem mekem wanem taem we yu lego skul?

Merial: Mi... mi wantem kam wan dokta. O wan nurse.  
Donal: Ol yangfala tede ol no tinkabaot ol narafala man nating! Be yu... yu difren olgeta. [*Hem i smile mo hem i luk luk daon. Donal hem i tekem han blong hem.*]  
Donal: Sapos yu nidim eni samting Merial.. mi nao mi save kivim. Yu nidim sam mo exercise buk o.. sam pen?  
Merial: Mi oraet.  
Donal: Mi save pem wan naesfala basket long yu.. o wan dress..  
Merial: Mi no wantem... [*Hem i girap be Donal tu hem i girap nao ya mo hem i holem hem.*]

Donal: Talem wanem we yu wantem! Talem!  
Merial: Lizzie hem i givim evri samting long mi we mi mi nidim.  
Donal: I no hem Merial! Mi stap givim plante mani long sista blong yu. Yu no save samting ya? Yu no laekem se mi mi talem aot.. be i tru.  
Merial: Plis...  
Donal: Kakae we i go long maot blong yu.... Mi nao mi stap payem. Haos ya... evrisamting. Mi bin les blong sista blong yu longtaem we i pass... Hem i ... hem i Mi no wantem wan woman olsem! Yu save from wanem nao mi stap helpem yufala oltaem? Mi laekem yu Merial. Mi laekem yu tumas.  
Merial: No...  
Donal: Yu no save talem no, long mi..  
[*Ol laet i go aot.*]

[*Lizzie, afta Jennie, Flora wetem Mary oli wokabaot i kam long stage.*]

Jennie: Yumi gat kompetition ya blong wok from! Yumi gat wan janis blong soem aot yumi long ol man! Be yumi ol woman, yumi no save wok tugeta nating!  
[*Oli no talem wan samting.*]  
Mary: I no falt blong mi..  
Lizzie: Yu nao yu bin mekem hed blong mi i lus!  
Flora: Yumi save go ahead iet..  
Jennie: Yu wan stupid Flora!  
Flora: Ohh!  
Jennie: Tufala ya oli wantem faet nomo! Sakem evri janis we yumi gat long tin doiti!  
Mary: Mi no save stap kwaet! Hem i stap spolem yumi ol woman...  
Jennie: Yu stap kwaet evri taem we Malcolm hem i kilim nogud yu! Yu neva mekem wan samting nating!  
Mary: Yu stap saed wetem hem nomo!

Lizzie: Mi nao mi bin faet from janis ya blong usum ol instruman blong Ironman! Yu yu kam talem se yu nomo wantem stap long band ya!

Flora: Yumi ol christian. Yumi mas forgivim yumi.

Mary: Hem i bin afterem man blong mi!

Lizzie: Mi no bin afterem hem....!

Jennie: Shurrap! Yutufala! Shurrap nao ya!  
*[Jimmy wokabaot i kam.]*

Jimmy: Kula!

Jennie: Yu stap folem mifala iet?!

Jimmy: Mi gat ol skul buk blong Merial.. hem i bin livim ol buk ya i stap..

Lizzie: Hem i go wer?

Jimmy: Hem i go samples wetem Donal..

Lizzie: Donal?  
*[Lizzie hem i stat blong wokabaot i go nao.]*

Mary: *[Lizzie hem i stap wokabaot i go pass long hem. Mary hem i holem han blong hem.]* Yu bin go wetem man blong mi ono? *[Lizzie hem i spit long fes blong hem. Mary hem i sek bigwan.]*

Mary: Shit...!

Flora: Papa God hem i save helpem yu nao ya Mary.

Mary: Bae mi kilim hem! Wan de bae mi kilim nogud hem!

Jennie: Mary!

Flora: Yu mas tonem narafala jik Mary...

Mary: Bae yu luk wanem bae mi mekem Flora! *[Hem i stap wokabaot i go.]*

Jimmy: Hem i kros nogud...

Flora: Bae yumi lukaotem tu narafala woman bakegen Jennie?

Jennie: Yu go ahead! Mi no kar!  
*[Hem i ron i go aot. Jimmy hem i lukim Flora mo hem i shragem sholda blong hem.]*

*[Lizzie hem i ron i kam long acting aria.]*

Lizzie: Merial! Merial! *[Hem i stap luk luk olabaot.]*

Merial!! Ohhh.. werum hem... Merial! *[Merial hem i wokabaot i kam wetem Donal. Han blong Donal i stap long sholda blong hem.]*

Lizzie: Yu tekem hem i go from?!

Donal: Hem i fraet! Eh Merial? Yu no bin wantem luk faet ya ah?

Merial: No...

Donal: Yu stap mekem ol rabis fasin long fored blong hem Lizzie.

Lizzie: Merial... *[Hem i putum han blong hem long sholda blong Merial, be Merial hem i mov i go.]* Yu livim ol buk blong yu longwe... Jimmy ikarem.

Donal: Laki se wan man hem i gat hed blong karem ol buk.

Lizzie: Taem we Mary hem i toktok long mi.. mi harem se.. hed iraon. Merial... Yu kros wetem mi? *[Merial i no toktok.]*

Donal: Bae mi go nao Lizzie.. Lukim yu samtaem.

Lizzie: Okay... Lukim yu Donal.

Donal: Gudnaet Merial! *[Hem i wet be Merial i no toktok.]*

Lizzie: Talem gudnaet long Donal!

Merial: Naet. *[Donal hem i go. Lizzie hem i go sidaon klosap long Merial.]*

Lizzie: Yu harem nogud from ol toktok ya we Mary i bin sakem? Ol woman oli kranke Merial. Oli neva save blamem ol man blong olgeta.. oli stap blamem ol woman olsem mi nomo. Mi no stilim ol man! Ol man oli kam from mi! Merial... mi no wantem mekem kaen wok olsem. Mi hatem ol man ya. Be bae mi mekem wanem? Bae mi faenem mani wer? *[Lizzie hem i strokem hed blong hem.]* Mi bae mi kuk... yu no kakae iet. Yu hangri ah?

Merial: No.

Lizzie: Yu mas kakae gud. Yu stap kam bigwan nao Merial.

Merial: Mi no wantem kam bigwan. Mi wantem stap wetem yu oltaem... Lizzie..

Lizzie: Bae yu glad blong lego mi wan de.

Merial: No Lizzie...  
*[Jimmy hem i wokabaot i kam. Hem i lukim tufala.]*

Jimmy: Merial ol buk blong yu!

Lizzie: *[Hem i girap mo hem i waepem eye blong hem.]*

Jimmy! Olsem wanem? Yu hangri?

Jimmy: Yes!

Lizzie: Wet smol! *[Hem i go aot. Jimmy hem i go kasem Merial.]*

Jimmy: Yu lego ol buk ya i stap. Yu no tinkabaot skul blong yu nating! Yu ronwei long faet ya ah?  
*[Merial hem i pikimap buk ya, mo Jimmy hem i sidaon mo hem i luk luk buk ya wetem hem.]*

Jimmy: Mi laekem pikta ya..

Merial: Woman ya hem i save flae.

Jimmy: Flae? Giaman!

Merial: I tru! Gel ya i bin save flae.. be wan de wan man i faenem wing blong hem .. mo hem i haedem i stap. Gel ya i fas nao. Hem i no save ronwe long man ya nating...

Jimmy: From wanem man ya hem i haedem wing blong hem.

Merial: Hem i wantem spolem hem! Olsem ol man nomo!

Jimmy: From? *[Merial hem i tekem buk ya mo hem i shuttem.]*

Merial: Yu tink se wanem?

Jimmy: Merial.. talem storian ya long mi.

Merial: Yu no save rid!

Jimmy: Be...

Merial: Yu no save wan samting nating!  
*[Jimmy hem i girap. Hem i harem nogud.]*

Jimmy: Mi bin ting se yu yu difren. Be yu olsem sista blong yu nomo!  
*[Hem i ron i go aot. Merial hem i lukim buk ya iet.]*

Merial: Sapos mi save fli...

Lizzie: Werum Jimmy? *[Hem i kam insaed wetem kakae.]*

Merial: Hem i go. *[Hem i wokabaot i go aot.]*

Lizzie: Merial! Kakae blong yu.. Merial!

*[Ol boe oli stan up tugeta. Oli stap serem wan cigarette.]*

Leonard: Mi wantem wan sel..

Fred: Yu gat mani?

Leonard: Mi les!

Tony: Mi gat wan hundred...

Fred: Wan hundred?!

Tony: Mummy i stap hidem mani blong hem! Mi faenem smol mani ya nomo long basket.. *[Jimmy hem i ron i kam. Fred hem i go long fored blong hem mo hem i holem hem.]*

Fred: Bae yumi mekem wanem nao? Yumi no save karem kaont eni ples..

Leonard: Ol man we oli oanem ol kava bar ya oli stap kam olsem ol witman.. tinkabaot mani nomo.

Leonard: Kakae i nomo gat long haos. Mi no save silip sapos mi no dring smol kava...

Fred: Yu kranke?  
*[Jimmy hem i ron i kam insaed. Leonard iluk hem. Hem i stan up long fored blong Jimmy.]*

Leonard: Hey.. hey... from wanem yu stap hariap olsem? *[Jimmy hem i ron raon long Leonard be Fred nao hem i kasem hem.]*

Fred: Jimmy! *[Hem i kasem Jimmy.]* Yu laekem mi ah? *[Hem i traem kisim hem.]*

Jimmy: Lego!

Leonard: Yu no jik Fred! Brata blong gelfren blong Tony!

Tony: Shurruup!

Jimmy: Lego mi!

Fred: Yu gat smol mani? Wan o tu hundred nomo?

Jimmy: Mi no gat mani nating!

Tony: Lettem hem i go Fred!

Fred: Yu wantem go wer Jimmy? Yu wantem folem ol gel bakegen?

Jimmy: Westem taem.

Leonard: Oli nomo stap wokem kranke band ya ah?

Tony: No kat.

Jimmy: Oli kranke.. mi hatem olgeta!

Fred: Yu laekem ol boe nomo..

Jimmy: Go lus!

Tony: Hey yu stap kros nogud olsem from?

Leonard: Talem wanem we bin hapen Jimmy!

Fred: Talem!

Jimmy: Yu harem storian ya finis!

Fred: Wan fren blong mi hem i luk.. hem i bin laf gogo! Kolosup hem i pispis long kalsong blong hem!

Tony: From wanem nao oli bin faet Jimmy?

Jimmy: Mary hem i kam let.. hem i bin spolem han blong hem...

Leonard: Malcolm i bin mek save hem ya!

Fred: Afta?

Jimmy: Yu save finis...

Leonard: Smol nomo.. yu talem ful storian long mifala.

Fred: Jimmy.....

Tony: Ale ale!

Jimmy: Mary hem i bin kam afta hem i singaotem ol nogud swer long Lizzie.. tufala ibin faet.. Mi bin stopem tufala blong no faet klosap long ol instruman ya! Sapos mi no

bin stap oli bin brek brekem evri samting! Mi nao mi karem ol skul buk blong Merial i go bak long haos! Mi helpem olgeta long evri saed.. afta.. *[Klosap Jimmy hem i wantem kri nao.]*

Leonard: Afta wanem? Oli no wantem givim titi long yu?

Jimmy: Ahh!

Leonard: Sori Jimmy! Sori tru! Yu no kros!

Fred: Yu luk save nao ah Jimmy? Ol gel oli olsem nao. Ol no gat wan stret tingting. Oli talem wan samting be oli no save go ahed wetem nating.

Tony: Oli no save wok tugeta.

Leonard: Yumi ol boe nao, sapos yumi gat wan tingting.. be yumi go from!

Jimmy: Sapos we yumi gat tink tink blong go insaed long kompetition ya.. bae yumi mekem!

Fred: Oli bin tink se oli mo gud bitim yumi ol boe!*[Ol boe oli lukim olgeta mo oli laf mo singaot, oli wokabaot tugeta nao.]*

Tony: Yumi ol boe tu yumi save singsing!

Fred: Ale Jimmy! Ale!

Rap: Yumi ol boe

Yumi stap hang long yumi!

Yumi save dipen long yumi ol boe!

No matta wanem

Bae yumi folem yumi

Blong ple football

Blong ple volley!

Naet i kam

Mo tingting i ton long dring

Ol boe oli no save stap kwaet long haos

Yumi no interest long kakae

O stori wetem ol woman mo pikinini!

Yumi no save silip erli long naet

No kat!

No kat!

No kat!

Insaed long yumi ol boe

Wan faea i stap bon

*[Ol man oli kam insaed blong dring kava. Donal hem i sidaon wetem olgeta.]*

Wan faea we i save kakae evri samting!

Mo yumi mas draonem faea ya

Wetem baket kava!

Leonard: Ale Jimmy! Bae yumi go! *[Donal hem i stap sidaon wetem jif. Oli stap storian. Ol boe oli wokabaot i kam.]*

Donal: Olsem wanem ol boe? Yu oraet?

Tony: Donal.. Jif... *[Trifala boe oli sek han wetem jif mo Donal be Jimmy hem i stap hid.]*

Fred: Olsem wanem?

Jif: Olsem oltaem.. *[Oli sek han.]* Yufala i go pem kava blong yufala.. Mifala i dring nao ya nomo. *[Ol boe oli konfus nao.]*

Donal: Jimmy! Yu tu yu stap folem ol boe ya?

Fred: Hem i les long ol gel ya Donal.

Leonard: Yu stap folem mifala nao ah Jimmy?

Donal: Ol gel ya...

Jif: Yu bin westem taem blong yu Donal! Yu bin traem bes blong yu blong helpem ol.. be luk wanem we i bin happen! *[Ol boe oli sigh mo sek sekem ol hed blong ol, olsem we oli sori bigwan.] Fasin blong ol gel tede i nogud!*

Leonard: I nogud we i nogud jif...

Jif: Ol woman nao oli stampa blong famili. Wok blong ol hem i blong stap long haos mo lukaotem ol pikinini. Sapos we ol woman i mekem stret wok blong hem, be ol pikinini bae oli kam ol gud kdufala man mo woman taem we oli kam bigwan.

Donal: I tru nomo jif! Mummy blong mi nao, hem i neva go wok.

Tony: Hemia nao..

Donal: Taem we mifala i go long jioj mifala i stap kwaet nomo. Pasta hem i talem se mifala nao ol bes pikinini long jioj ya! From fasin blong mama blong mifala nao!

Jif: Ol woman oli stap wokabaot olabaot tede! *[Ol boe oli laf smol. Jif hem i lukim olgeta.]* Mo yufala ol boe tu!

Fred: No gat samting blong mekem jif..

Jif: Yufala evriwan i gat graon long aelan! Yu save mekem karen!

Leonard: Aelan i mo gud jif. Be...

Fred: Mifala i no gat mani blong go bak.

Tony: Mani i no gat nating.

Donal: *[Hem i karem aot mani long poket blong hem.]* Ale.. yu go pem kava blong yufala.

Fred: Tank yu Donal! Tank yu!

Leonard: Yu wan gudfala man tru.

Tony: Bae mifala i no save forgettem samting ya Donal!

Donal: Yu go! Yu go! *[Ol boe oli wokabaot i go long bar. Jif mo Donal oli stap stori sloslo.]*

Fred: *[Hem i sakem mani long bar.]* Tri long wan hundred!

Jimmy: Hey!

Leonard: Yumi stap forgettem smol 50 percent ya!

Jimmy: Hem i givim mani blong yumi evriwan..

Tony: Bae yu dring blong fifty nomo..

Jimmy: Eh no!

Fred: Wan hundred bakegen blong bigman ya!

Kalo: Fo long wan hundred. *[Hem i tekem mani mo hem i pourem kava.]*

Fred: Kava ya i strong Jimmy! Yu no tro aot long hem...

Jimmy: Mi no save tro aot tu! *[Ol boe oli tekem kava mo oli dring.]*

Tony: Yumi laki blong kasem wan fri sel olsem...

Fred: Hey lukim wanem we i stap kam.. *[Lizzie hem i stap wokabaot i kam, be hem i wokabaot slo slo, form hem i drong long kava finis.]*

Leonard: Smol Mummy blong yu Jimmy!

Fred: Wotaem bae yu mekem kastom long hem?

Jimmy: Tony nao bae hem i mekem kastom long sista blong mi! Yu no save se hem i stap ded long Jennie?

Tony: Giaman!

Fred: Hem i kasem yu stret!

Tony: Hey Lizzie!  
Lizzie: Yufala i wantem wanem?  
Fred: Mifala i wantem fulap samting..  
Lizzie: Yu go hangem nek!  
Leonard: Hem i interes long ol man we oli gat mani nomo. We oli save pem wan sel blong hem...  
Lizzie: Yu joinem olgeta nao ah Jimmy? Yu nomo stap kam lukim Merial..  
Fred: Ahhh! Yu nomo go lukim hem?  
Leonard: Yu wantem brekem hat blong hem Jimmy?!  
Lizzie: Yufala nao yufala i stap toktok kranke! Yu no mekem hem i sem...  
Jimmy: Mi no kar nating long wan gel olsem tu!  
Lizzie: Wan gel olsem? Yu minim wanem?  
Jimmy: Lego...  
Lizzie: Yu minim wanem? *[Hem i go pulum Jimmy long t-shirt blong hem.]* Wan gel olsem wanem?  
Fred: Yu save nomo..  
Lizzie: Mi save se bae mi brekem hed blong yu! Bae yu no toktok nogud long hem! Yu harem!  
Kalo: Hey! Stap kwaet!  
Lizzie: Yu stap wari long wanem blong yu?  
Donal: *[Hem i stap wokabaot i kam wetem tufala sel.]* Lizzie!  
Lizzie: Donal...  
Donal: Yu no toktok strong olsem long ples ya..  
Lizzie: Olgeta nao oli mekem mi mi harem nogud...  
Donal: Sapos yu no save stap kwaet, yu go!  
Lizzie: Olsem wanem long ol beo ya?  
Donal: Enaf Lizzie! Mi les long fasin blong yu finis!  
Lizzie: Yu save hangem nek blong yu tu bigman! *[Hem i wokabaot i go. Donal hem i kros be hem i no toktok.]* Wan de bae ol man oli luk save yu tu!  
Fred: Hem i wan.. Hem i mekem yu yu harem nogud ah Donal?  
Donal: I no gat man long ples ya we i no save mekem mi mi harem nogud...  
Leonard: Hem i wan rotten pis mit nomo.  
Donal: Bae yumi dring wan mo sel ol boe! Jimmy yu wantem dring bakegen? *[Leonard hem i karem mani ya. Fred mo Leonard oli go form ol sel.]*  
Jimmy: Bel blong mi istap tonton...  
Donal: Yu mas dring Jimmy! Sapos no bae yu neva kam wan man! Karem wan sel blong hem.  
Tony: Yu no wari Jimmy... *[Leonard mo Fred oli givim ol sel long ol bakegen. Oli stan up mo dring. Oli freeze.]*

*[Jennie hem i stap sidaon long bed blong hem. Hem i holem guitar blong hem.]*

Jennie: Naet ya i dak  
No gat wan star nating long skae  
Mun i stap haed  
Long ol big bigfala cloud  
Mi harem se

Bae mi neva kasem ples  
We ol pijin blong solwora oli kri.

Mi mi mestem rod  
Mi nomo save se  
Bae mi faenem wei blong mi ono?  
Mi mi mestem rod  
Mi mi mestem long tudak  
Mi nomo save wer ples bae mi go!

- Lizzie: Jennie! Jennie!  
Jennie: Lizzie!  
Lizzie: Mi save kam luk yu smol taem....  
Jennie: Sidaon! Sidaon!  
Lizzie: Mi harem yu yu singsing. Afta mi ting se, bae mi kam luk yu.  
Jennie: Wanem i rong?  
Lizzie: Band ya i finis nao ya?  
Jennie: Yes.  
Lizzie: Yumi no save kam tugeta bakegen?  
Jennie: Yumi bin sing wan taem nomo.. long jioj. Band ya i neva bin wan tru band.  
Lizzie: Yumi save mekem iet Jennie..  
Jennie: Hu bae i tekem ples blong Mary?  
Lizzie: Yu, mi mo Flora nomo! Yumi no nidim fulap man insaed.  
Jennie: Ol instruman?  
Lizzie: Bae yumi go ahead wetem gitar mo ukelele. Bae yumi ple long ol hotel!  
Jennie: Lizzie..  
Lizzie: Mi les long laef blong mi Jennie..  
Jennie: Yu les long wok ya we yu stap mekem?  
Lizzie: Mi no laekem ol man.. mi no laekem ol. Mi fraet...  
Jennie: Yu fraet long wanem?  
Lizzie: Merial.. bae ol man oli talem long hem se hem i semak olsem mi. Jimmy hem i talem long mi finis.  
Jennie: Jimmy?!  
Lizzie: Hem i bin talem se Merial hem i toktok nogud long hem. Wan gel olsem... Olsem mi..  
Jennie: Bae mi skinim hem!  
Lizzie: Plante man oli stap toktok nogud long mi.. i no hem nomo. Merial i stap harem ol toktok ya. Mo Mary nao... Merial hem i no wantem silip long sem bed wetem mi long naet ya. Mi kam long haos be Merial hem i talem se hem i wantem silip long floa...  
Jennie: Bae hem i harem mo gud tumoro.  
Lizzie: Hem i bin laekem tingting blong band ya Jennie.  
Jennie: Hem i wantem nomo se yu stopem .. wanem we yu stap mekem. Yu save stopem iet Lizzie.  
Lizzie: Bae mifala i kakae wanem?  
Jennie: Plante woman oli no gat mani be oli no...

Lizzie: Plante woman oli mekem.

Jennie: Yu no save faenem wan narafala wok?

Lizzie: Ahh lego! *[Hem i girap nao.]*

Jennie: Bae mi wokabaot smol wetem yu... *[Oli wokabaot i go aotsaed.]*

Lizzie: Bae yumi no save go ahead wetem band ya?

Jennie: No. *[Jennie hem i stap kwaet mo Lizzie hem i wokabaot i go aot.]*

Lizzie: Yu save singsing Jennie. Yu save singsing gud tumas.

Jennie: Naet Lizzie... *[Tony hem i wokabaot i kam wetem Jimmy. Jimmy hem i no save wokabaot hem wan.]*

Tony: Hem i drong long kava ...

Jennie: Yu nao yu mekem hem i drong olsem?

Tony: Donal hem i pem kava .. *[Klosap hem i dropem Jimmy i go long graon. Jennie hem i ron i kam blong holem hem.]*

Jennie: Yufala i ibin tokabaot mifala fulnaet?

Tony: From?

Jennie: Yu bin harem wanem we i bin happen!

Tony: Bae yumi putum Jimmy i go long bed blong hem.  
*[Oli liftimup Jimmy nao.]*

Jennie: From wanem nao ol boe oli mas drong oltaem? Yu no gat eni narafala samting blong mekem?

Tony: Okay okay...

Jimmy: Lego.. mi wantem go long ..toilet...

Jennie: Yu go! *[Jimmy hem i ron i go aot.]* Ohhh...

Tony: Bae hem i tro aot, afta hem i kam gud. Yu harem nogud ah Jennie?

Jennie: Yu tink se wanem? Mi bin wantem singsing.. long fored blong fulap man. Bae mifala i kam firs gel band long ples ya... Wanem bae mi mekem nao ya?

Tony: Jennie...

Jennie: Lego mi!

Tony: Yu save mekem fulap samting iet.

Jennie: Wanem?

Tony: Yu wan naesfala gel... Sapos yu talem .. bae mi promisem yu se mi nao mi man blong yu. Mi no stap toktok kranke. Sapos yu agri.. bae mi no save pleple o giaman.

Jennie: Wanem kaen futa nao bae yumitu save gat Tony?

Tony: Bae mi faenem wok wan de...

Jennie: Bae yumitu rao from evri wan wan hundred.

Tony: Yu stap tinkabaot mani nomo! Mi lavem yu Jennie.

Jennie: Lav?

Tony: Mi stap giaman long ol fren blong mi, se mi no kar long yu nating. Be i no tru. Evri taem we mi luk yu.. mi harem mi glad. Mi wantem talem aot nem blong yu oltaem. Mi wantem tajem yu... Mi neva bin talem kaen toktok olsem long eni narafala gel... Hat blong mi i fulap tumas Jennie.

Jennie: Yu lavem mi?

Tony: Mi wantem marretem yu.

Jennie: Wanem bae i happen afta?

Tony: Afta? Afta?

Tony: Hem i drim blong ol gel  
Boe i givim hat blong hem  
Bae yu putum wit dress  
Bae mi putum ring long han blong yu.

Jennie: Wet!  
Mi wantem save wan samting  
Bae yumi tinkabaot smol!  
Mi lukim tumas gel we oli no glad nating long marret laef blong ol  
Yumi stap tokabaot lav  
Bae i mekem ol samting i kam gud  
Be mi wantem save  
Mi wantem save  
Wan o tu samting firstaem!  
Sapos yu wantem wan samting we mi no agri long hem  
Bae yu kilim nogud mi from?  
Talem!

Tony:  
Hem i drim blong ol gel  
Boe i givim hat blong hem  
Bae yu putum wit dress  
Bae mi putum ring long han blong yu.

Jennie: Wet!  
Olsem wanem sapos we  
Mi wantem go long wok  
Mi gat janis blong winim mani mo wokabaot olabaot!  
Bae yu jalus oltaem?  
Bae yu folem mi evriples?  
Yu tink se woman  
i mas stap long haos  
Kuk mo lukaotem pikinini?  
Sapos mi gat janis blong mekem wan samting  
Yu bae yu blokem mi?  
Talem!

Tony:  
Hem i drim blong ol gel  
Boe i givim hat blong hem  
Bae yu putum wit dress  
Bae mi putum ring long han blong yu.

*[Tony i stap holem fes blong Jennie klosap long fes blong hem.]*

*[Merial hem i stap sidaon long stage. Hem i no stap mekem eni samting. Skul basket blong hem istap long graon. Saon recording i stap ple long bihaen]*

Lizzie: Merial! Bae yu let long skul!

Lizzie: Yu no gat feva...

Lizzie: Yu no mekem flas blong yu! Ol narafala pikinini oli stap wokabaot! Gerrup mo go long skul nao ya!

Lizzie: Yu les?! No mekem mi mi kros Merial! Mi no wantem harem kaen toktok olsem! Yu go!

Donal: Morning Lizzie!

*[Merial i jumpap fraet]*

Lizzie: Yu kam long erli morning ya from?

Donal: Mi kam blong .. talem sori. Mi bin .. harem nogud.. Mi nao mi askem Ironman sapos we yu save yusum ol instruman ya.. Afta yufala ...

Lizzie: Yu stap go wer? Bae yu go long skul iet!

Donal: Wanem i rong?

Lizzie: Hem i go kranke stret! Hem i no wantem go long skul!

Donal: Bae mi tekem hem i go long skul. Trak blong mi stap.

Lizzie: Yu save tekem hem Donal?

Donal: Be yes!

Lizzie: Merial! Donal bae i save tekem yu long trak blong hem. Ale, yu go!

Lizzie: Yu fraet long wanem! Yu save hem.

Donal: Yu kam Merial. Mi no gat tumas taem. Yu no talem aot eni samting. Yu harem?

*[Merial i sidaon bakegen]*

No gat ples blong ron

No gat ples blong hid

I no gat wan toktok we yu save talem

Yu wantem nomo se

Eye blong yu i blind

Sorae blong yu i fas

Yu no wantem harem vois blong hem

Yu no wantem!

Yu nomo gat haos

Yu nomo gat fren

Yu stap nomo yu wan

Yu wetem hem.

Yu stap long wan nogud drim

Yu wantem wek up long hem

Be nogud drim ya

I no gat end.. i no gat end.

*[Jimmy i wokabaot i kam]*

Jimmy: Merial! Merial ...yu stap sidaon long rod ya from?

Merial: Long rod?

Jimmy: Wan truk bae i sperem yu! *[Hem i tekem han blong Merial mo hem i pulum hem i go smol. Be Merial i sidaon bakegen]* Sof mud i spolem skirt blong yu finis!

Lizzie bae hem i mek save yu ya! Bae yu go hariap long haos. Jenis gud bifo  
Lizzie hem i luk yu.

Merial: Bae mi no go bak long haos...

Jimmy: Wanem?

Merial: Bae mi nomo go bak.

Jimmy: Stupid! Bae yu mekem wanem sapos we yu no go bak? Yu stap skul gud.. be  
tingting blong yu hem i olabaot nomo! Sapos yu fraet tumas, bae yumi go tugeta...

Merial: No...

Jimmy: Wanem i rong?

Merial: Bae mi oraet.

Jimmy: Yu kranke stret!

Merial: Yu go Jimmy. *[Jimmy i stan up mo hem i luk luk hem.]*

Jimmy: Merial... yu bin toktok nogud long mi.. Mi bin kros wetem yu. Be.. ya.. mi faenem  
samting ya long san bij.. lukim... Hem i naes! *[Hem i wan bracelet. Hem i tekem  
aot long han blong hem mo hem i givim long Merial.]*

Blong yu.

Merial: Jimmy...

Jimmy: Tekem! Mi no bin payem.. mi faenem nomo.

Merial: Mi nogud Jimmy. Mi olsem sista blong mi nomo nao.

Jimmy: Mi no minim toktok ya Merial.. mi bin kros.

Merial: i tru.

*[Hem i girap. Hem i holem basket blong hem iet.]*

Yu wan gudfala boe Jimmy.

*[Hem i wokabaot i go.]*

Jimmy: Bae yu go bak long haos nao?

*[Merial hem i noddem hed blong hem.]*

Lukim yu Merial....

*[Merial hem i stan up mo hem i wokabaot smol. Mary hem i kam insaed wetem sam narafala  
woman mo Flora. Oli longwe lelebet long Merial.]*

Mary: Hem i stap go long skul.. be ol mani blong skul fee i kam wer?

Ol wom: Ahh!

*[Merial hem i stap kwaet. Hem i no wantem wokabaot i kam.]*

Mary: Hem i gat ol gudfala gudfala samting...

Wom 1: Be sista blong hem ipem wetem doiti mani!

Wom 2: Mani we i kam long han blong ol man blong yumi!

Mary: Merial! Yu kam ya!

*[Merial hem i lukim ol mo hem i ron i go aot.]* Merial!

Flora: Yumi bin mekem Merial i harem nogud.. yu no lukim fes blong hem?

Mary: Hem i laef long mani blong yumi ol mama long ples ya!

Wom 1: Mi tu mi no sori long gel ya..

Flora: I no falt blong hem.

Wom 2: Hem bae i mekem sem fasin! Bae yu luk!

Mary: Hem i sud sem ya!

Wom 1: Bae yumi tijim woman blong rod ya!

Wom 2: Yumi mas mekem ol kaen woman olsem oli luk save..

Mary: Katem aot ol hair blong hem!

Won 2: Bae hem i bulhed ya!

Wom 1: Bae ol man oli no wantem tajem hem nating!

Wom 2: Draggem hem i go long fored blong jif!

Flora: Mary...

Mary: Wanem ya?

Flora: Mi no.. bae yumi no kilim Lizzie.

Wom 1: From?

Flora: I no wan Christian fasin.

Mary: Hem i no stap wari long christian fasin, taem we hem i stap stilim ol man olabaot long ples ya!

Flora: Mi no laekem wanem we hem i stap mekem.. be

Wom 1: Yumi mas mekem wan samting!

Wom 2: Ol pikinini blong mi oli hangri! Be hem i stap kakae steak evri de!

Mary: Sapos yu no wantem stan up wetem mifala, yu go lus!

Wom 1: Yu stap go long jioj evri Sunde!

*[Hem i spit long hem.]*

Mary: Flora! Bae yu kam wetem mifala ono?

Flora: No.

Mary: Ale!

*[Flora hem i go aot nao.]*

Chorus: Yumi go!  
 Bae hem i sek we!  
 Hem i tink se hem i save go ahead  
 Spolem yumi gogo  
 Ol woman olsem!  
 Ol doiti long wol ya!  
 Ol samting nating!  
 Oli stap stilim ol man  
 Oli stap spreadim ol doiti sik  
 Mekem pikinini blong rod olabaot!

Fred: Hey lukim ol woman ya!

Leonard: Oli kros ya!

Tony: Yufala i stap go wer?

Mary: Bae mifala i mek save woman blong rod ya!

Tony: Long Lizzie long we?

Leonard: I gud ya!

Fred: Bitch faet ya! *[Ol boe oli ron. Oli watchem ol samting mo oli stap singaot be oli no mekem wan samting nating taem ol woman oli karem aot Lizzie long haos blong hem.]*  
 Bae yumi tekem hem i kam aot long haos blong hem!  
 Bae yumi putum hem long stuhl ya  
 Kattem aot hair blong hem  
 Tarem evri klus blong hem!  
 Bae yumi mek save hem ya!

*[Ol woman oli kam stan up long fored blong haos blong Lizzie. i no gat man.]*

Fred: Yu go karem aot hem long haos ya!

Leonard: Yufala i save faet ono?

Wom 1: Bae yu luk!

Mary: Lizzie! Kam aotsaed! Kam aotsaed nao ya!

Tony: Hem bae i kilim nogud Mary. Han blong yu i nogud.

Mary: Hem i no save winnim mifala evriwan.. Bae yumi go pulum aot hem!

*[Ol woman oli wokabaot smol nomo, be Lizzie hem i wokabaot i kam aot long haos.]*

Lizzie: Aftanun olgeta. Yu wantem luk mi?

Mary: Yes!

Lizzie: Mi stap.

Wom 1: Mifala i kam blong kilim nogud yu ya!

Lizzie: From?

Mary: Yu stap karem ol man olabaot long ples ya!

Lizzie: Mi neva karem eni man blong yufala tri nating. *[Ol woman oli konfus smol.]* Mi no interes long kaen doiti olsem tu. *[Ol boe oli laf.]*

Mary: Evriwan i save fasin blong yu Lizzie! i no gat wan man we hem i sef i stap taem we yu stap wokabaot olabaot!

Lizzie: Ol man blong yufala nao oli stap wokabaot olabaot! i no mi nomo!

Wom 1: Mifala i gat tingting blong aotem evri woman blong rod we i stap raon long ples ya.

Lizzie: Kass! Bae yufala i bisi kasem krismes atink.

Wom 2: Ol smol gel we oli skul iet oli stap folem rod nao!

Mary: Enaf blong toktok!

*[Oli ron i kam kasem Lizzie. Lizzie hem i ron kasem do mo hem i pikimap wan busnaef, mo hem i tonem hem blong fesem olgeta. Ol mama oli sek.]*

Singsing:

Bitch faet!

Ol woman oli ron nao

Bitch faet

Hem i karem naef!

Hem i mo gud bitim video

Mo hem i fani tu

Bitch faet!

*[Jennie mo Flora oli ron i kam insaed. Flora hem i fraet blong faet, be Jennie hem i traem stopem olgeta.]*

Kilim hem!

Woman ya i no strong nating

Hey luk!

Hem i stap fraet long naef

Oli stap scratch

Oli kakae han blong hem

Oli singaot

Olsem we man i stikim pik!

Bitch faet!

*[Ol woman oli draggem Lizzie i go aot bifo ol boe oli finisim singsing ya. Ol boe ol finis afta oli luk se ol woman oli lus. Oli lukim olgeta mo oli ron i go long saed blong stage. Ol woman oli draggem Lizzie i kam insaed. Jif i kam insaed tu..]*

*[Mary mo ol narafala woman oli stap wan saed. Jennie mo Flora oli stap klosap long Lizzie. Jimmy hem i stap wetem ol. Jif hem i wokabaot i kam insaed.]*

Lizzie: Oli tarem ol klos blong mi jif! Oli mas pem ol klos ya!

Jif: Sidaon sidaon! Yufala evriwan! *[Ol boe oli ron i kam insaed.]* Yufala ol woman, wanem nao problem blong yufala?

Mary: Yu save hem finis jif!

Jif: Hmmm...

Mary: Evriwan i save wanem wok we hem i stap mekem!

Jif: Yu talem aot komplain blong yu Mary. Mi bae mi lisen.

Lizzie: Yu....

Mary: Hem i stap spolem ol man blong mifala jif! Hem i karem ol man olabaot long ples ya! Hem i laef long mani we i shud go blong fidim ol pikinini blong mifala!

Lizzie: Ol man oli usum evri mani blong pem kava!

Jif: Lizzie! Yu stap kwaet! Bae fin blong yu i mas go antap sapos yu toktok bakegen! Yu tu bae yu gat janis blong toktok!

Mary: Mifala ol woman mifala i bin suva from ol wok we woman ya i stap mekem! Mifala i kam nomo blong askem yu blong yu mekem hem i luk save jif!

Ol wom: Yes! yu luk i sem ia, faea i ded!  
Yu mas stopem hem nao!

Jif: Mary, yu save olsem wanem se Lizzie hem i stap karem ol man blong yufala?

Wom 1: Kass! Evriwan i save!

Mary: Hem i no wok! Hem i karem mani wer? Hem i gat mani blong sendem gel ya Merial i go long skul. Ol mama we mifala no mekem kaen olsem... ol pikinini blong yumi, oli stap suva!

Jif: Hmm... Lizzie? Yu gat eni samting blong talem?

Lizzie: Mi neva bin karem man blong Mary! Hem i stap askem.. be mi mi neva bin go wetem hem!

Mary: Giaman!

Lizzie: Yu save olsem wanem?

Jif: Lizzie! Talem stret! Yu stap folem rod ono gat?

Wom 1: Hem i stap folem rod! Hem wetem sista blong hem!

Lizzie: Bae mi kilim yu yu ded ya!

Jennie: Lizzie! No... *[Jennie i holem taet hem.]*

Flora: Yu no toktok olsem long Merial! Hem i no mekem eni samting!

Jif: Yufala ol woman! Yu no save se ples ya hem i nakamal? Yufala nao yu stap long gat ya! Yu no save singaot eni taem we yu yu wantem! Yu mas wet kasem taem we mi talem long yu se yu save toktok! Lizzie....

Lizzie: Hem i minim wanem? Hem i mas talem stret long mi! Hem i minim wanem?

Jif: Yu talem long hem. Hao nao yu save se smol sista blong hem i stap ....mekem sem wok olsem hem?

Wom 1: Mi luk hem wetem man ya Donal...

Jif: Donal?!

Lizzie: Hem i bin let long skul! Donal i tekem hem long trak blong hem.

Wom 1: Afta hem i tekem hem long baksaed blong truk ya.. *[Hem i laf. Ol boe bihaen tu oli laf mo singaot.]*

Mi luk wetem eye blong mi! *[Lizzie hem i singaot olsem we wan man ibin stikim hem.]*

Lizzie: Merial! Merial! *[Hem i faldaon long knee blong hem olsem we hem i stap pre.]*  
Merial! *[Ples i go dak. Merial hem i stan up long stage, long wan laet.]*

Merial: Mi lavem yu Lizzie. *[Lizzie hem i ron i kam, be bifo hem i save kasem ples we Merial i stap long hem, Merial i faldaon. Lizzie hem i liftemup hem long han blong hem.]*

Lizzie: No.. no... *[Mary, Flora, Jennie mo Jimmy oli stan up kolsup long hem.]*

Lizzie: Ahh... mi no wantem se hem i olsem Merial. Talem se yu no kros. Mi bin stap wetem wan daddy. Hem nao i bin tekem mi. Mummy hem i faenem aot mo hem i ronnem mi. Be mi gat bel wetem yu finis... Mi bin promis se bae i no save hapen long yu. Mi neva singaotem yu gel blong mi. Mi bin tink se bae yu harem nogud sapos yu faenem aot se yu yu bon long fasin olsem...*[Lizzie mo Merial nomo oli stap long laet nao.]*

I bin gat wan taem  
We ol gel i save flae  
Long ol wind we i stap krosem skae  
Ol rabis samting  
I neva bin save kasem ol  
Be taem olsem i finis  
Long taem we i pas  
*[Jimmy hem i stap stirrem wan buket we hem i gat hambrew long hem. Fred hem i wokabaot i kam. Hem i lukim buket ya. Jimmy hem i go ahed blong stirrem buket ya oltaem.]*

Fred: Yu stirrem gud Jimmy...

Jimmy: Bae i redi tunaet.. yu no wari. *[Tony mo Leonard oli kam insaed. Oli stap laf tugeta.]*

Tony: Atink Ironman i mas win...

Leonard: Eh no! Sam long ol narafala band oli mo gud iet.

Tony: No gat!

Jimmy: Samting ya bae i mekem hed i lus wan taem ah?

Tony: Ohh man! Wan taem we mi bin dring.. mi bin tekem wan kup nomo.. be nexis de blong hem.. mi no save tinkabaot wanem we mi bin mekem nating!

Leonard: Hemia taem we yu bin kam long haos, mo yu bin faetem kupa?

Tony: Yes! Mi rutum evri kapa long haos be tumoro mi mas bildimap bakegen!

Jimmy: Bae i gat faet ya!

Fred: Olsem ol aksen movie! *[Hem i giaman faetem Jimmy.]*

Tony: Jimmy.. bae yu no talem long Jennie, se yumi stap dring samting ya.

Jimmy: From?

Tony: Yu no talem long hem.

Jimmy: Yu stap fraet?

Tony: Mi no wantem harem toktok!  
*[Jimmy hem i laf.]*

Jimmy: Yu stap westem taem blong yu wetem sista blong mi Tony.

Tony: Ahh! Wan woman i no save talem long mi wanem blong mekem! [*Leonard mo Fred oli jikim hem.*]

Fred: Mi bae mi neva stap wetem wan gel longtaem.

Leonard: Yu laekem ol gel olsem Lizzie nomo ah?

Fred: Yes olsem Lizzie, be fri. Mi mi wantem blong fri!

Leonard: Yu lukim Lizzie las wik? Hem i bin drong kranke evri naet!

Tony: Hem i stap harem nogud from samting ya we smol sista blong hem i mekem.

Fred: Hem i olsem nao!

Jimmy: Yu tink se i tru wanem we oli talem?

Fred: Wanem ya?

Jimmy: Storian ya se...

Leonard: Storian blong Donal? Donal i mekem trubol wetem gel ya, afta hem i kilim hem wan i ded?

Fred: Giaman!

Tony: Ahh no!

Jimmy: Jennie hem i stap talem se Donal i bin forse hem.. afta hem i bin swollem daon ol tablet ya.

Fred: Ol gel oli wantem blamem ol man nomo!

Leonard:

[*Hem i talem wan toktok long sorrae blong Fred. Fred hem i laf kranke.*]

Tony: Atink firs band bae i ple i no longtaem. Bae yumi go daon.

Fred: Ale Jimmy.. bae yumi go...

Jimmy: Bae mi jus kam... [*Ol boe oli go aot. Jimmy hem i stap.*] Mi no save se.. Mi no save from wanem nao yu mekem olsem Merial! Kass! Sapos we yu bin talem long mi, se man ya i stap mekem wan nogud samting long yu.. mi nao mi bin kilim hem i ded! Merial.. yu wantem se mi kilim hem i ded? Mi save mekem! Yu talem! [*Hem i lisen be i no gat samting i happen. Hem i stirrem buket bakegen.*] Yu kranke blong mekem olsem. Yu ronwei long mifala evriwan. Atink yu no kar nating .. se mi mi stap mistem yu... Be i oraet. Mi bae mi dring samting ya tunaet...

[*Lizzie i kam sidaon long stool. Yu harem noes blong fulap man oli stap fulumap haos.*]

Mary: Atink oli stat finis. [*Hem i luk Lizzie mo hem i sek.*]

Lizzie: Olsem wanem Mary? [*Mary i ignorem hem.*]

Malcolm? Yu no save talem helo long mi? Yu stap fraet long woman blong yu ah? [*Hem i stap klosap long hem mo hem i stap laf.*]

Malcolm: Lukaot se yu no mekem ol woman i kros bakegen Lizzie.

Lizzie: Yu stap folem gel ya narasead iet Malcolm? O yu faenem wan niufala wan finis?

Mary: Malcolm.. [*Hem i pulum hem i go.*]

[*Lizzie i dring aot long wan botel we hem i stap karem. Flora mo Jennie oli wokabaot i kam insaed.*]

Lizzie: Jennie! Flora! Kam ya! Hey!

Flora: Lizzie...

Jennie: No Flora....lego.. [*Hem i wantem ronwei.*]

Lizzie: Luk! Mi gat botel rum i stap! [*hem i ron i go long tufala gel ya.*] Yufala i mas dring! Dring wetem mi! Tinkabaot taem we yumi bin dring rum tugeta? Yu bin

askem wanem nao ol drim blong mifala ah Jennie? Yu tinkabaot? Ol drim.... [*Hem i dring nao.*] Yu Jennie! Yu! [*Hem i wantem givim bottle long hem. Jennie i tekem, be hem i no dring.*] Bae yumi danis bakegen! Long ol band ya!

Jennie: Okay Lizzie... [*Trifala boe oli kam insaed. Tony hem i sek taem we hem i lukim Jennie klosap long Lizzie.*]

Lizzie: Hem i olsem bifo.. taem we yumi bin stap tugeta! [*Hem i huggem tufala.*]

Flora: Yumi ol gud gudfala fren Lizzie.. mifala i no save forgetem yumi ya!

Jennie: Yes...

Tony: Jennie! [*Hem i wokabaot i go mo hem i stan up klosap long hem.*] Jennie yu stap mekem wanem wetem hem? Kam long ples ya. [*Jennie hem i luk hem mo hem i luk Lizzie.*]

Lizzie: Bae mifala i danis tugeta tede naet Tony! Ol gel, bae yumi danis... ah?

Tony: Hem i kranke. Yu kam...

[*Jimmy hem i kam insaed mo hem i lukim olgeta.*]

Fred: Bae yu kasem wan rabis sik sapos we yu stap klosap long hem Flora!

Leonard:

[*Hem i lukim Mary hem i stap narasaed wetem Malcolm.*]

Hey luk!

Fred: Bae yufala i pleple tunaet ol gel? Firs gel band long ples ya!

Leonard: Evriwan i stap!

Lizzie: Mifala i no nidim olfala cao ya! Yumi tri nomo!

Tony: Hem i drong tumas Jennie!

[*Jennie hem i wokabaot i go klosap long Tony nao.*]

[*Donal hem i wokabaot i kam klosap long band. Hem i pikimap microphone.*]

Donal: Hariap ol man mo ol woman! Kompetition ya bae i go ahed i no long taem! Mi wantem luk ples i fulap! Tunaet bae yumi givim janis long ol niufala band we oli stap kam antap!

[*Lizzie hem i jenis olsem we hem i nomo drong. Hem i toktok be hem i no singaot strong iet.*]

Lizzie: Hem i mekem olsem we hem i wan gudfala man! Wan bigman long komuniti ya! Yufala i save wanem we hem i bin mekem?

Tony: Stap kwaet Lizzie!

Lizzie: Stap kwaet? Mi nomo save stap kwaet!

Fred: Yu wan woman blong rod! Yu no save stap kwaet!

[*Hem i laf.*]

Lizzie: Yu stap salem yu wan from wan sel kava! Yu olsem mi nomo!

Tony: Lukaot se hem i no tok kranke long fored blong ol man ya..

Donal: Hariap olgeta! Taem blong yumi i stap ron! Ol boe..

[*Hem i stap toktok long microphone mi hem i toktok long band ya.*]

Yumi redi ono?

Lizzie:

[*Lizzie hem i go long fored mo hem i singaot strong.*]

Donal! Yu no sem blong stan up long fored blong ol man?

Fred: Eh.. Lizzie! Lizzie!

Leonard: Hed blong hem i lus!

Donal: Yufala ol boe! Karehem i go! Bae hem i spolem evri samting!

Lizzie: Yu nao yu bin spolem evri samting! *[Ol boe oli go from Lizzie. Oli kasem hem mo oli stat blong pusum hem i go aot.]*

Fred: Yu kam .. yu wantem se mi slappem gud yu? Kam!

Donal: Yumi no wantem ol drong man long ples ya!

Flora: Tony! Tony lego hem! Bae yu spolem hem ya!

Lizzie: No! No! Bae mi talem aot! Bae mi... *[Donal hem i pikimap microphone bakegen.]*

Donal: Yufala i redi nao?

Man 1: Mifala i redi!

Donal: Sori long problem ya! Be i finis nao! Ironman bae oli ple! *[Sam man oli klap.]*  
Grup ya i stap singim fulap singsing we yumi evriwan i laekem tumas. Tunaet bae oli singim wan niufala singsing...

Jimmy: No! *[Evriwan i stap kwaet.]* No.... *[Hem i wokabaot i go antap long stage. Hem i karem aot wan smol naef.]* I no finis..

Donal: Jimmy!

Jimmy: I tru wanem we Lizzie i talem! I tru! Yu bin spolem Merial! Yu bin....

Donal: Putum naef ya i go daon! Yu wantem go long kalabus long ful laef blong yu?

Jimmy: Be yu? Yu bae yu wokabaot olabaot! Hem i ded finis! *[Hem i tekem naef olsem we bae hem i stikim Donal.]* Sapos yu wantem bae mi kilim hem i ded nao ya! Bae mi.... *[Paoa blong hem i lus.]* Merial.... *[Donal hem i lukluk olabaot. Ol man oli stap lukim hem. Hem i wokabaot i go aot. Jennie hem i ron i go long acting aria hem i putum han blong hem raon long Jimmy.]*

Jimmy: Yu mas sing Jennie...Blong hem. Yu mas sing! *[Jennie hem i stan up. ]*

Jennie: Flora! *[Flora hem i ron i kam.]*

Lizzie! Mary! Bae yumi sing nao!*[Mary hem i wokabaot folem Lizzie.]*

Malcolm: Mary! Yu stap mekem wanem?

Mary: Yu no save blokem mi nao ya Malcolm! Lizzie! *[Oli wokabaot i go long stage. Donal hem i aot finis. Ol boe oli stap lukim olgeta.]*

Jennie: Kam sistas kam!  
Sapos we mi stan up mi wan  
Ol man oli no save harem voes blong mi!  
Kam sistas kam!  
Kam sistas kam!  
Kam Sistas kam!  
Sapos we mi stan up mi wan  
Ol man oli no save harem  
voes blong mi!  
Kam sistas kam!  
Kam sistas kam!

*[Ol gel oli kam long stage.]*

Bae yumi kam tugeta!  
Bae yumi wok blong jenisim wol ya  
Yu luk woman ya i kri  
Wota blong eye blong hem i ron!  
Bae yumi givim han long hem!  
Traem mekem  
Hem i save go ahead iet!  
Kam sistas kam!  
Kam bratas kam!

*[Jimmy mo ol boe long band oli join nao.]*

Sapos mifala nomo  
Ol man oli no save harem voes blong mifala!  
Kam bratas kam!  
Kam sistas kam!

*[Ol gel i singsing tugeta long fored, Donal nomo hem i no stap.]*

Bae yumi no save klosem ae  
Long ol nogud samting  
Yu no save giaman se i no olsem  
Yu no save yusum toktok ia  
Kastom mo kalja  
Blong mekem se laef i no save jenis  
Brata! Sista! kam!  
Kam sistas kam

Sapos mifala nomo  
Ol man oli no save harem voes blong mifala!

Brata! Sista! kam!  
Kam sista kam!

Kam brata kam!

Brata! Sista! kam!

Kam sista kam! [*full lineup*]

Kam brata kam!

Brata! Sista! kam!